

quidem prætermis ab Augustino iis Scripturæ testimoniis, quibus Hieronymus in Isaiam observat uti eos qui volunt peccatorum aliquando finiri supplicia.

Libri de Fide et Operibus meminit Augustinus in Enchiridio, cap. 67; in libro de octo Quæstionibus Dulcitii, quæst. 1, n. 2; et in epistola 205, ad Consentium, n. 18.

In librum de Fide et Operibus vide lib. 2, cap. 38, Retractationum, tom. 1, col. 646, a verbis, Interea missa sunt, usque ad verba, Quibusdam videtur. M.

S. AURELII AUGUSTINI HIPPONENSIS EPISCOPI DE FIDE ET OPERIBUS LIBER UNUS^(a).

Refellitur error quorumdam triplex, et contra demonstratur: 1, Non omnes indiscrete admittendos ad Baptismum, si que esse tolerandos in Ecclesia malos, ut non negligatur ecclesiastica disciplina; 2, Baptizandis non solius fidei, sed vitæ eliam christianæ tradendas esse regulas; 3, Baptizatos demum, nisi vitam malam mutarint, nunquam ad salutem æternam fide sola præventuros.

CAPUT PRIMUM. — 1. *Error quorumdam triplex.* Omnes ad Baptismum citra discriminem admittendos sentiunt. Quibusdam videtur indiscrete omnes admittendos esse ad lavacrum regenerationis, quæ est in Christo Jesu Domino nostro, etiamsi nalam turpemque vitam facinoribus et flagitiis evidentissimis notam¹ mutare noluerint, atque in ea se perseveraturos aperta etiam professione declaraverint². Verbi gratia, si quisquam meretrici adhæret, non ei prius præcipiatur ut ab ea discedat, et tunc veniat ad Baptismum; sed etiam cum ea manens mansurumque se confidens³, seu etiam profitens, admittatur et baptizetur; nec impediatur fieri membrum Christi, etiamsi membrum meretricis esse perstiterit (I Cor. vi, 15): sed postea doceatur quam sit hoc malum, jamque baptizatus de mutandis in melius moribus instruatur. Perversum enim putant atque præpostorum, prius docere quemadmodum debeat vivere christianus, et deinde baptizari. Sed censem præcedere debere Baptismi sacramentum, ut deinde sequatur vitæ morumque doctrina: quam si tenere et custodire voluerit, utiliter fecerit; si autem noluerit, retenta fide christiana, sine qua in æternum periret, in quolibet scelere immunditiaque permanserit, salvum eum futurum tanquam per ignem, velut qui ædifica-

verit super fundatum quod est Christus, non aurum, argentum, lapides pretiosos, sed ligna, fenum, stipulam (I Cor. iii, 11-15); id est, non justos castosque mores, sed iniquos et impudicos.

2. *Morum doctrinam censem nonnisi post Baptismum esse tradendam.* Ad hanc autem disputationem videntur impulsi, quod eos moverit⁴ non admitti ad Baptismum qui dimissis uxoribus alias duixerint, vel feminas quæ dimissis viris aliis nupserint; quia haec non conjugia, sed adulteria esse Dominus Christus sine ulla dubitatione testatur (Math. xix, 9). Cum enim negare non possent esse adulterium, quod Veritas adulterium esse sine ambage confirmat⁵, eisque suffragari vellent ad accipiendum Baptismum, quos hujusmodi laqueo ita captos viderent, ut si non admitterentur ad Baptismum, sine ullo sacramento mallent vivere vel etiam mori, quam disrupto adulterii vinculo liberari: humana quadam miseratione commoti sunt ad eorum causam sic suscipiendam, ut omnes cum eis facinorosos et flagitosos, etiam nulla prohibitione correptos, nulla instructione correctos, nulla poenitentia mutatos ad Baptismum admittendos esse censerent; existimantes eos, nisi fieret, in æternum esse perituros; si autem fieret, etiam in illis malis perseverantes salvos per ignem futuros.

ADMONITIO PP. BENEDICTINORUM.

Ad emendandum librum de Fide et Operibus, usi sumus codicibus MSS. Vaticanis tribus, et tredecim Gallicanis, tunc videlicet bibliothecæ Regiae, uno Sorbonicæ, alio Augustinianorum majoris conuentus Parisiensis, alio collegii Parisiensis Bernardinorum, item alio Ecclesiæ Remensis, Ecclesiæ Laudunensis, abbatiæ Corbeiensis, Rotomagensis S. Audœni, Metensis S. Arnulphi, S. Michaelis in periculo mari, Casalis Benedicti, Divionensis S. Benigni, et Cisterciensis. Adhibui- mus etiam lectiones variantes a Lovaniensibus decerpitas ex MSS. tribus Belgicis; necnon antiquiores editiones Am. Er. et Lov., id est, Joannis Amerbachii, Désiderii Erasmi, et Theologorum Lovaniensium.

Comparavimus præterea eas omnes editiones initio Retr. et Confess. t. 1, memoratas. M.

¹ Unus e Vaticanis MSS., deditam.

² Sic MSS. At editi, aperita etiam confessione declaraverint.

³ Am. et Er., manens mansurusque confidens. Lov., manens mansurumque se confitens.

^(a) Scriptus circa initium anni 415.

¹ Sic Er. et MSS. At Lov., nōverint.

² Plurique MSS., sine ambiguitate.

CAPUT II. — 3. *Propter fidem christianam salvandos esse baptizatos, etiamsi mores quantumlibet malos non correxerint. Mali in Ecclesia sic tolerandi, ut non omittatur correptio et disciplina. Quibus respondens, hoc primum dico, ne quis ea testimonia Scripturarum, quae commixtionem bonorum et malorum in Ecclesia vel praesentem indicant, vel futuram praenuntiant, sic accipiat, ut disciplinae severitatem sive diligentiam solvendam omnino atque omittendam, non illis edoctus Litteris, sed sua operatione deceptus existimet.* Neque enim, quia illam primi populi permixtionem Moyses Dei famulus patientissime perserebat, ideo non in multos etiam gladio vindicavit. Et Phinees sacerdos adulteros simul inventos ferro ultore confixit (*Num. xxv, 5-8*). Quod utique degradationibus et excommunicationibus significatum est esse faciendum hoc tempore, cum in Ecclesiæ disciplina visibilis fuerat gladius cessaturus. Nec, quia beatus Apostolus inter falsos fratres tolerantissime congemiscit (*II Cor. xi, 26*), et quosdam etiam diabolicis invidentiae stimulis agitatos, Christum tamen praedicare permittit (*Philipp. i, 15-18*); ideo pareendum censet illi qui uxorem patris sui habuit; quem præcipit congregata Ecclesia tradendum satanæ in interitum carnis, ut spiritus salvus sit in die Domini Jesu (*I Cor. v, 4-5*): aut ideo ipse alios non tradidit satanæ, ut discerent non blasphemare (*I Tim. i, 20*): aut frustra dicit, *Scripsi vobis in epistola non commisceri fornicariis, non utique fornicariis hujus mundi, aut avaris, aut raptoribus, aut idolis servientibus; alioquin debueratis de hoc mundo exire: nunc autem scripsi vobis non commisceri, si quis frater nominatur aut fornicator, aut idolis serviens, aut avarus, aut maledicus, aut ebriosus, aut rapax; cum hujusmodi nec cibum quidem sumere.* Quo enim mihi de iis qui foris sunt judicare? Nonne de iis qui intus sunt vos judicatis? *De his autem qui foris sunt Deus judicabit. Auferte malum ex vobis ipsis* (*I Cor. v, 9-15*). Ubi quidem aliqui id quod dictum est, *ex vobis ipsis*, ita intelligunt, ut ex se ipso unusquisque auferat malum, hoc est, ut ipse sit bonus. Sed utrolibet modo intelligatur, sive ut severitate Ecclesiæ mali excommunicationibus corripiantur, sive ut se quisque corripiendo et corrigendo a se ipso auferat malum; illud tamen quod supra dictum est, non habet ambiguitatem, ubi præcipit non commisceri eis fratribus qui in aliquo supra dicto vitio nominantur, id est, noti famosique sunt.

CAPUT III. — *Quo animo peccantes corripiendi. Domini præceptum de corrigendis malis.* Quo autem animo et qua charitate misericors ista severitas adhibenda sit, non solum eo loco ubi ait, *ut spiritus salvus sit in die Domini Jesu*; sed alibi quoque evidenter ostendit dicens, *Si quis non obaudit verbo nostro per epistolam, hunc notate, et nolite commisceri cum eo, ut erubescat; et non ut inimicum eum existimet, sed corripite ut fratrem* (*II Thess. iii, 14, 15*).

4. Et ipse Dominus exemplum singulare patientiae, qui etiam in duodecim Apostolis usque ad passionem diabolum pertulit; et qui ait, *Sinite utraque crescere usque*

ad messem, ne forte dum vultis colligere zizania, simul eradicetis et triticum (*Matth. xiii, 29, 50*); retiaque illa in similitudine Ecclesiæ usque ad littus, hoc est usque ad saeculi finem, bonos et malos pisces habitura praedixit; et cetera, si qua de permixtione bonorum et malorum sive aperte sive per similitudines locutus est: non ideo tamen omittendam censuit Ecclesiæ disciplinam; imo vero admonuit adhibendam, quando ait: *Attendite vobis; si peccaverit in te frater tuus, vade, et corripe eum inter te et ipsum solum. Si audierit te, lucratus eris fratrem tuum. Si autem non audierit te, assume tecum unum vel duos, ut in ore testium duorum vel trium stet omne verbum. Quod si non audierit eos, dic Ecclesiæ. Si autem nec Ecclesiam audierit, sit tibi tanquam ethnicus et publicanus.* Deinde ipsius severitatis terrorem gravissimum adjecit etiam eo loco, dicens: *Quæ solveritis in terra, soluta erunt et in cælo, et quæ ligaveritis in terra, ligata erunt et in cælo* (*Id. xviii, 15-18*). Prohibet etiam sanctum dari canibus (*Id. vii, 6*). Nec contrarius est Apostolus Domino, quia dicit, *Peccantes coram omnibus argue, ut cœteri timorem habeant* (*I Tim. v, 20*); cum ille dicat, *Corripe eum inter te et ipsum.* Utrumque enim faciendum est, sicut infirmitatis diversitas admonet eorum quos utique non perdendos, sed corrigendos curandosque suscepimus; et aliis sic, aliis autem sic sanandus est. Ita etiam est ratio dissimulandi et tolerandi malos in Ecclesia: et est rursus ratio castigandi et corripiendi, non admittendi vel a communione removendi.

CAPUT IV. — 5. *Errores non servantium modum in Scripturis intelligendis. Donatistarum errori alius error contrarius ex Scripturis perperam acceptis.* Errant autem homines, non servantes modum; et cum in unam partem procliviter ire coeperint, non respiciunt divinæ auctoritatis alia testimonia, quibus possint ab illa intentione revocari, et in ea quæ ex utrisque temperata est veritate ac moderatione consistere: nec in hac re tantum, de qua nunc quæstio est, sed etiam in aliis multis. Nam quidam intuentes divinarum testimonia Litterarum, quibus unus Deus colendus insinuatur, eundem Patrem qui est Filius, sanctumque Spiritum putaverunt; alii rursus veluti morbo contrario laborantes, cum attenderent ea quibus Trinitas declaratur, nec valerent intelligere quomodo sit unus Deus, cum et Pater non sit Filius, nec Filius sit Pater, nec Spiritus sanctus aut Filius aut Pater, diversitates etiam substantiarum asserendas putaverunt. Quidam intuentes in Scripturis sanctæ virginitatis laudem, connubia damnaverunt: quidam rursus ea testimonia consecstantes quibus casta conjugia prædicantur, virginitatem nuptiis æquaverunt. Quidam cum legerent, *Bonum est, fratres, non manducare carnem, neque bibere vinum* (*Rom. xiv, 21*), et nonnulla similia; creaturam Dei et, quas voluerunt, escas immundas esse senserunt: quidam vero legentes, *Omnis creatura Dei bona est, et nihil abjiciendum quod cum gratiarum actione percipitur* (*I Tim. iv, 4*), in voracitatem vinolentiamque collapsi sunt; non sibi valentes auferre vitia, nisi eis e contrario vel tanta vel majora succederent,

6. Sic etiam in hac causa, quæ habetur in manibus, quidam intuentes præcepta severitatis, quibus admonemur corripere inquietos, non dare sanctum canibus, ut ethicum habere Ecclesiæ contemptorem, a compage corporis membrum quod scandalizat avellere; ita perturbant Ecclesiæ pacem, ut conentur ante tempus separare zizania, atque hoc errore cæcati ipsi potius a Christi unitate separantur. Qualis nobis causa est adversus schisma Donati. Et hoc non cum illis qui neverunt Cæcilianum, non veris, sed calumniosis criminibus appetitum, et perniciosa sententiam suam mortifero pudore non deserunt; sed cum illis quibus dicimus: Etiamsi mali fuissent propter quos in Ecclesia non estis, vos tamen eos ferendo quos emendare aut segregare minime poteratis, in Ecclesia permanere debuistis. Quidam vero e contrario periclitantes, cum bonorum malorumque commixtionem in Ecclesia demonstratam vel prædictam esse perspexerint, et patientiæ præcepta didicerint (quæ ita nos firmissimos reddunt, ut etiam si videntur in Ecclesia esse zizania, non tamen impediatur aut fides, aut charitas nostra, ut quoniam zizania esse in Ecclesia cernimus, ipsi de Ecclesia recedamus), destituendam putant Ecclesiæ disciplinam¹, quamdam perversissimam securitatem præpositis tribuentes, ut ad eos non pertineat nisi dicere quid cavendum quidve faciendum sit, quodlibet autem quisque faciat non curare.

CAPUT V.—7. *Sana doctrina est ut nec propter malos recedatur ab Ecclesia, nec in malos ipsos negligatur disciplina.* Nos vero ad sanam doctrinam pertinere arbitramur ex utrisque testimoniis vitam sententiamque moderari², ut et canes in Ecclesia propter pacem Ecclesiæ toleremus, et canibus sanctum, ubi pax Ecclesiæ tuta est, non demus. Cum ergo sive per negligentiam præpositorum, sive per aliquam excusabilem necessitatem, sive per occultas obreptiones invimus in Ecclesia malos, quos ecclesiastica disciplina corrigere aut coercere non possumus; tunc (ne ascendat in cor nostrum impia et perniciosa præsumptio, qua existimemus nos ab his esse separandos, ut peccatis eorum non inquinemur, atque ita post nos trahere conemur veluti mundos sanctosque discipulos, ab unitatis compage quasi a malorum consortio segregatos) veniant in mentem illæ de Scripturis similitudines et divina oracula vel certissima exempla, quibus demonstratum et prænuntiatum est, malos in Ecclesia permixtos bonis usque in finem sæculi tempusque judicii futuros, et nihil bonis in unitate ac participatione Sacramentorum qui eorum factis non consenserint obfuturos. Cum vero eis per quos Ecclesia regitur, adest salva pace Ecclesiæ potestas disciplinæ adversus improbos aut nefarios exercendæ, tunc rursus, ne socordia segnitiaque dormiamus, aliis aculeis præceptorum, quæ ad severitatem coercitionis pertinent, excitandi sumus, ut gressus nostros in via Domini ex utrisque testimoniis illo duce atque adju-

¹ Ita MSS. Editi autem, instituendam putant esse et Ecclesiæ et disciplinam.

² Am. et Er., tutam sententiam moderari.

tore dirigentes¹, nec patientiæ nomine torpescamus, nec obtentu diligentiae sæviamus.

CAPUT VI.—8. *Ad Baptismum an admittendus adulter et peccator non correctus. An præcepta bene vivendi non prius tradenda quam Baptismus.* Hac ergo secundum sanam doctrinam moderatione servata, videamus unde agitur, id est, utrum ad percipiendum Baptismum sic admittendi sunt homines, ut nulla ibi vigilet diligentia, ne sanctum canibus detur; usque adeo ut nec apertissimi adulterii perpetratores et ejus perseverantiæ professores a Sacramento tantæ sanctitatis videantur arcendi: quo sine dubio non admitterentur, si per ipsos dies quibus eamdem gratiam percepturi, suis nominibus datis, abstinentia, jejuniis, exorcismisque purgantur, cum suis legitimis et veris uxoribus se concubituros profiterentur, atque hujus rei, quamvis alio tempore licet, paucis ipsis solemnibus diebus nullam continentiam servatueros. Quo modo igitur ad illa sancta recusans correctionem adulter admittitur, quo recusans observationem non admittitur conjugatus?

9. Sed prius, inquiunt, baptizetur; deinde doceatur quid ad bonam vitam moresque pertineat. Fit hoc ubi quemquam forte dies urget extremus, ut ad verba paucissima, quibus tamen omnia continentur, credat, Sacramentumque percipiat; ut si ex hac vita migraverit, liberatus exeat a reatu præteriorum omnium peccatorum. Si autem sanus petit, spatiumque discendi est, quod aliud opportunius tempus reperiri potest, quo audiat quemadmodum fidelis fieri ac vivere debeat, quam illud cum attentiore animo atque ipsa religione suspenso saluberrimæ fidei Sacramentum petit? An usque adeo dissimulamus a sensibus nostris, ut vel nos ipsos non recordemur quam fuerimus attenti atque solliciti quid nobis præcipierent a quibus catechizabamur, cum fontis illius Sacraenta peteremus, atque ob hoc Competentes etiam vocaremur; vel non intueamur alios, qui per annos singulos ad lavacrum regenerationis accurront, quales sint ipsis diebus quibus catechizantur, exorcizantur, scrutantur, quanta vigilantia convenient, quo studio serveant, qua cura pendeant? Si tunc tempus non est discendi², quæ vita congruat tanto, quod accipere desiderant, Sacramento; quando erit? An vero cum acceperint, in tantis criminibus permanentes etiam post Baptismum, non novi homines, sed rei veteres? ut videlicet perversitate mirabili prius eis dicatur, Induite hominem novum; et cum induiti fuerint, postea dicatur, Exuite veterem: cum Apostolus sanum ordinem tenens dicat, *Exuite veterem, et induite novum* (*Coloss. iii, 9, 10*); et ipse Dominus clamet, *Nemo assuit pannum novum vestimento veteri, et nemo mittit vinum novum in utres veteres*. (*Matth. ix, 16, 17*). Quid autem aliud agit totum tempus, quo catechumenorum locum et nomen tenent, nisi ut audiant quæ fides et qualis vita debeat esse christiani; ut cum se ipsos probaverint, tunc de mensa Domini manducent, et de calice bibant? Quoniam qui manducat et bibit indigne, judi-

¹ MSS., atque utore.

² MSS., dicendi.

cium sibi manducat et bibit. (I Cor. xi, 28, 29.) Quod autem sit per omne tempus, quo in Ecclesia salubriter constitutum est, ut ad nomen Christi accedentes catechumenorum gradus excipiat¹; hoc sit multo diligentius et instantius his diebus, quibus Competentes vocantur, cum ad percipiendum Baptismum sua nomina jam dederunt.

CAPUT VII. — 40. *Virgo quæ nesciens nupsit alieno viro, an censenda sit adultera. Apostolorum exemplo et litteris nil jurari qui volunt baptizandos de sola fide, baptizatos vero de moribus admonendos.* Quid si, inquit, virgo nesciens viro nupserit alieno? Hoc si semper nesciat, nunquam ex hoc erit adultera: si autem sciat, jam ex hoc esse incipiet, ex quo cum alieno viro sciens cubaverit. Sicut in jure prædiorum, tamdiu quisque bonæ fidei possessor rectissime dicitur, quamdiu se possidere ignorat alienum: cum vero scierit, nec ab aliena possessione recesserit, tunc malæ fidei perhibetur, tunc juste injustus vocatur. Absit ergo ut sensu plane non humano, sed plane vano sic doleamus cum flagitia corriguntur, tanquam connubia dirimantur: maxime in civitate Dei nostri, in monte sancto ejus (Psal. XLVII, 2, 5), hoc est in Ecclesia, ubi nuptiarum non solum vinculum, verum etiam sacramentum ita commendatur, ut non licet viro uxorem suam alteri tradere; quod in republica tunc Romana, non solum minime culpabiliter, verum etiam laudabiliter Cato fecisse prohibetur (Plutarch. in Catone minore). Neque hinc diuinus modo disputare opus est, cum et illi quibus respondeo non audeant affirmare, nullum hoc esse peccatum, neque negent esse adulterium, ne ipsi Domino sanctoque Evangelio aperte convincantur obsistere. Sed cum eis placet primum admittendos esse tales ad percipiendum Baptismi sacramentum et ad Dominicam mensam, etiamsi correctionem voce manifestissima recusaverint; imo vero nihil eos de hac re prorsus admoneri oportere, sed postea doceri; ut si præcepti observationem receperint, culpamque corixerint, habeantur in tritico; si autem contempserint, inter zizania tolerentur: satis ostendunt non se crimina ista defendere, aut quasi levia vel nulla sint agere. Quis enim adulterium bonæ spei christianus nullum seu parvum crimen existimet?

41. Ordinem tamen quo hæc in aliis vel corriganter vel ferantur, de Scripturis sanctis se proferre arbitrantur, cum dicunt Apostolos sic egisse; et de Litteris eorum quædam testimonia proferunt, ubi reperiuntur prius insinuasse doctrinam fidei, ac deinde morum tradidisse præcepta. Atque hinc intelligi volunt, fidei tantummodo regulam baptizandis esse insinuandam²; postea vero jam baptizatis etiam vitæ in melius mutandæ præcepta tradenda: quasi aliquas Apostolorum Epistolas legant ad eos qui baptizandi sunt datas, ubi de sola fide disputaverunt; et alias ad baptizatos, quibus præcepta de malis caven-

¹ Editi, accipiant. Concinnius MSS., excipiat; ipse scilicet gradus catechumenorum eos qui ad Christi nomen accedunt.

² Sic MSS. At editi, intimandam.

dis bonisque instituendis moribus continentur. Cum igitur eos ad Christianos jam baptizatos dedisse Litteras constet, cur utroque sermone contextæ sunt, et eo scilicet qui ad fidem, et eo qui ad vitam bonam pertinet? An forte jam placet ut baptizandis utrumque non demus, ei baptizatis utrumque reddamus? Quod si absurde dicitur, ergo fateantur Apostolos doctrinam suam ex utroque perfectam suis Epistolis indidisse; sed propterea plerumque insinuasse prius fidem, ac deinde quod ad vitam bonam pertinet subjecisse, quia et in homine ipso nisi præcedat fides, vita bona sequi non poterit. Quidquid enim homo veluti recte fecerit, nisi ad pietatem quæ ad Deum est, referatur, rectum dici non oportet. Quod si arbitrarentur aliqui stulti et nimis imperiti Apostolorum Epistolas ad catechumenos datas, profecto etiam ipsi faterentur, nondum baptizatis præcepta morum qui fidei congruant, simul cum fidei regulis intimanda: nisi forte ad hanc necessitatem sua nos isti disputatione compellunt, ut primas partes Epistolarum apostolicarum ubi de fide loquuntur, catechumenis legendas velint; posteriores autem fideliibus, ubi jam præcipitur quemadmodum Christiani vivere debeant. Quod si stultissimum est dicere; nullum ergo documentum est hujus opinionis ex Epistolis Apostolorum, cur ideo arbitrenur baptizandos de sola fidè, baptizatos autem de moribus admonendos, quia illi primis partibus Litterarum suarum commendaverunt fidem, ac postea consequenter ut bene a fidelibus viveretur hortati sunt. Quamvis enim illud prius, hoc posterius, saepissime tamen una contextione sermonis utrumque catechumenis, utrumque fidelibus, utrumque baptizandis, utrumque baptizatis; sive ut instruantur, sive ne obliviscantur, sive ut profiteantur, sive ut confirmentur, doctrina sanissima et diligentissima prædicandum est. Epistolæ itaque Petri, Epistolæ Joannis, de quibus quædam testimonia commemorant, addant et Pauli et aliorum Apostolorum; ea ratione accipiendum est quod adverterunt prius de fide ac postea de moribus dici, quam, nisi fallor¹, apertissime exposui.

CAPUT VIII. — 42. *A Petro non sola fides, sed et pœnitentia baptizandis prædicata. Pœnitentia indicta, non solius infidelitatis, sed vitæ veteris mutandæ in novam.* Sed in Actibus Apostolorum Petrus, inquit, sic allocutus est illos qui verbo auditio baptizati sunt uno die tria millia, ut eis solam fidem, qua in Christum crederent, prædicaret. Qui cum dixissent, Quid faciemus? respondit eis, Agite pœnitentiam; et baptizetur unusquisque vestrum in nomine Domini Iesu Christi in remissionem peccatorum, et accipietis donum Spiritus sancti. Cur ergo non advertunt quod dictum est, Agite pœnitentiam? Ibi est enim vitæ veteris expatriatio, ut nova induantur qui baptizantur. Cui autem fructuosa est pœnitentia, quæ agitur de mortuis operibus, si in adulterio perseveret aliisque sceleribus, quibus dilectio mundi hujus involvitur?

¹ Editi, quod, nisi fallor. At MSS., quam, nisi fallor. Subaudi, rationem.

15. Sed infidelitatis, inquiunt, tantummodo, quæ in Christum non crediderunt, eos voluit agere pœnitentiam. Mira præsumptio (nolo quidquam gravius dicere), quando eo auditio quod dictum est, *Agite pœnitentiam*, solius infidelitatis acta dicitur, cum vita mutanda ex vetere in novam doctrina evangelica traderetur, ubi utique et illud est quod in ea sententia ponit Apostolus, *Qui furabatur, jam non suretur* (*Ephes. iv, 28*); et cætera, quibus exsequitur quid sit deponere veterem hominem et induere novum.. In his autem ipsis verbis Petri habent unde admoneri potuissent, si diligenter attendere voluissent. Cum enim dixisset, *Agite pœnitentiam, et baptizetur unusquisque vestrum in nomine Domini Iesu Christi in remissionem peccatorum, et accipietis donum Spiritus sancti. Nobis enim hæc est promissio et filiis nostris, et omnibus qui sunt longe quoscumque advocaverit Dominus Deus noster;* continuo subjecit qui librum scripsit, atque ait: *Et cæteris verbis pluribus testificatur, dicens, Eripite vos a sæculo iacio pravo. At illi avidissime capientes exceperunt verba, et crediderunt, et baptizati sunt; et adjectæ sunt illa die tria millia animæ* (*Act. ii, 38-41*). Quis hic non intelligat, cæteris pluribus verbis, quæ a scriptore propter longitudinem reticentur, id egisse Petrum, ut eriperent se ab hoc sæculo pravo; quandoquidem ipsa sententia breviter indita est, cui persuadendæ verbis pluribus Petrus instabat. Ipsa quippe summa posita est, cum dictum est, *Eripite vos a sæculo hoc pravo. Verbis autem pluribus, ut hoc fieret, testificabatur Petrus. In his verbis erat mortuorum operum condemnatio, quæ nequiter agunt hujus sæculi dilectores, et commendatio vitæ bonæ, quam teneant atque sectentur qui se ab hoc pravo sæculo eripiunt. Jam itaque, si placet, affirmare conentur, cum se eripere ab hoc sæculo pravo, qui tantummodo credit in Christum, etiamsi in flagitiis quibus voluerit perseveret usque ad professionem adulterii. Quod si dicere nefas est, audiant baptizandi non solum quid credere debeant, sed etiam quemadmodum se ab hoc pravo sæculo eripiant. Ibi enim necesse est ut audiant quemadmodum credentes vivere debeant.*

CAPUT IX.—14. Spadonis post fidei professionem statim baptizati exemplo male uti adversarios. Spado, inquiunt, ille quem Philippus baptizavit, nihil plus dixit, quam, *Credo Filium Dei esse Iesum Christum;* et in hac professione continuo baptizatus est. Num ergo placet ut hoc solum homines respondeant, et continuo baptizentur? nihil de Spiritu sancto, nihil de sancta Ecclesia, nihil de remissione peccatorum, nihil de resurrectione mortuorum, postremo de ipso Domino Iesu Christo nihil nisi quia Filius Dei est, non de incarnatione ejus ex virginе, non de passione, de morte crucis, de sepultura, de tertii diei resurrectione, de ascensione ac Sede ad dexteram Patris aliquid dicendum est catechizanti, ac profitendum credenti? Si enim Spado cum respondisset, *Credo Filium Dei esse Iesum Christum,* hoc ei sufficere visum est, ut continuo baptizatus abscederet; cur non id sequi-

mur? cur non imitamur, atque auferimus cætera quæ necesse habemus, etiam cum ad baptizandum temporis urget angustia, exprimere interrogando, ut baptizandus ad cuncta respondeat, etiamsi ea memoriae mandare non vacavit¹? Si autem Scriptura tacuit, atque intelligenda dimisit cætera, quæ cum illo Spadone baptizando Philippus egit, atque in eo quod ait, *Baptizavit eum Philippus* (*Act. viii, 35-38*), intelligi voluit impleta omnia, quæ licet taceantur in Scripturis gratia brevitatis, tamen serie traditionis sci mus implenda; pari modo etiam in eo quod scriptum est evangelizasse Philippum Spadoni Dominum Iesum, nullo modo dubitandum est et illa in catechismo dicta esse, quæ ad vitam moresque pertinent ejus qui credit in Dominum Jesum. Hoc est enim evangelizare Christum, non tantum dicere quæ sunt credenda de Christo, sed etiam quæ observanda ei qui accedit ad compagem corporis Christi: immo vero cuncta dicere quæ sunt credenda de Christo, non solum cujus sit filius, unde secundum divinitatem, unde secundum carnem genitus, quæ perpessus et quare, quæ sit virtus resurrectionis ejus, quod donum Spiritus promiserit dederitque fidelibus; sed etiam qualia membra, quibus sit caput, quærat, instituat, diligat, liberet, atque ad æternam vitam honoremque perducat. Hæc cum dicuntur, aliquando brevius atque constrictius, aliquando latius et uberiorius, Christus evangelizatur; et tamen non solum quod ad fidem, verum etiam quod ad mores fidelium pertinet, non prætermittitur.

CAPUT X.—15. Locus Pauli se nihil scire præter Christum Iesum profidentis. Praecepta duo de dilectione Dei et proximi male referri, alterum ad baptizandos, alterum ad baptizatos. Hoc intelligi potest etiam in eo quod commemorant dixisse apostolum Paulum, *Nihil me duxi scire in vobis, nisi Christum Iesum, et hunc crucifixum* (*I Cor. ii, 2*). Quod illi pulant ita dictum, tanquam nihil aliud eis insinuatum esset; ut primiū crederent, ac deinde baptizati quidquid ad vitam moresque pertinet discerent. Hoc inquiunt, Apostolo satis superque sufficit, qui eis dixit quod et si multos paedagogos haberent in Christo, sed non multos patres, quia eos in Christo Iesu per Evangelium ipse genuisset (*Id. iv, 15*). Si ergo ille qui per Evangelium genuit, quamvis gratias agat quod neminem ipsorum baptizaverit nisi Crispum et Gajum, et Stephanum (*Id. i, 14, 46*), nihil eos amplius docuit quam Christum crucifixum; quid si dicat aliquis, nec surrexisse Christum eos audisse, quando per Evangelium geniti sunt? Unde est igitur quod eis dicit, *Tradidi enim vobis in primis, quia Christus mortuus est secundum Scripturas, et quia sepultus est, et quia resurrexit tertia die secundum Scripturas* (*Id. xv, 3, 4*); si nihil nisi crucifixum docuerat? Si autem non ita intelligunt, sed hoc quoque ad Christum crucifixum pertinere con-

¹ Editi, memorie mandare non valuit; et paulo post, intelligenda admisit. Melius MSS., non vacavit.... intelligenda dimisit.

² Editi, nisi ut primiū. Abest, nisi, a MSS.

tendunt¹; sciant in Christo crucifixo multa homines discere, et maxime quod *velut homo noster simul crucifixus est, ut evacuetur corpus peccati, et ultra non serviamus peccato* (*Rom. vi, 6*): unde etiam de se ipso dicit, *Mihi autem absit gloriari, nisi in cruce Domini nostri Jesu Christi, per quem mihi mundus crucifixus est, et ego mundo* (*Galat. vi, 14*). Proinde attondant, et videant quemadmodum docēatur atque discatur Christus crucifixus, et ad ejus crucem novarint pertinere quod etiam nos in ejus corpore crucifigimur mundo; ubi intelligitur omnis coercitio malorum concupiscentiarum: ac per hoc fieri non potest ut eis qui eruce Christi formantur², professa adulteria permittantur. Nam et apostolus Petrus de sacramento ipsius crucis, hoc est passionis Christi, admonet, ut qui ea conseruantur peccare desinant, ita loquens: *Christo ergo passo in carne, et vos eadem cogitatione armamini; quia qui mortuus est carne, desiit peccare, ut jam non hominum desideriis, sed voluntate Domini Dei reliquum in carne vivat* (*I Petr. iv, 1, 2*); et cetera, quibus consequenter ostendit, eum pertinere ad Christum crucifixum, hoc est, per carnem passum, qui in ejus corpore crucifixis³ carnalibus desideriis bene vivit per Evangelium.

46. Quid, quod etiam duo illa praecepta, in quibus Dominus ait totam Legem Prophetasque pendere, huic suae opinioni suffragari arbitrantur? et sic ea commemorant, ut quoniam primum praeceptum dictum est, *Diliges Dominum Deum tuum ex toto corde tuo, et ex tota anima tua, et ex tota mente tua; secundum autem simile huic, Diliges proximum tuum tanquam te ipsum* (*Matth. xxii, 37-40*); primum credant pertinere ad baptizandos⁴, ubi dilectio Dei praecipitur, secundum autem ad baptizatos, ubi videntur esse mores conversationis humanae: sic obliti quod scriptum est, *Si fratrem tuum quem vides non diligis, Deum quem non vides quomodo diligere poteris* (*I Joan. iv, 20*)? et illud aliud in eadem Epistola Joannis, *Si quis diligit mundum, non est charitas Patris in illo* (*Id. ii, 15*). Quo autem pertinent omnia flagitia morum malorum, nisi ad mundi hujus dilectionem? Ac per hoc illud primum praeceptum, quod ad baptizandos pertinere arbitrantur, sine bonis moribus observari nullo pacto potest. Nolo pluribus immorari: nam diligenter considerata ista duo praecepta, ita ex alterutro connexa reperiuntur, ut nec dilectio Dei possit esse in homine, si non diligit proximum, nec dilectio proximi, si non diligit Deum. Sed ad rem quae nunc agitur, quod de his duobus praeceptis diximus sufficit.

CAPUT XI.—47. *Objectio, quod Israelitæ prius mare transierint et post legem acceperint.* At enim populus Israel primum per mare Rubrum ductus est, quo significatur Baptismus; et postea legem accepit,

¹ sic MSS. At editi, concedunt.

² Lov., *in cruce Christi informantur*. Abest, *in, ab* editis aliis et a MSS., quorum præcipui loco, *informantur*, habent, *formantur*.

³ Lov., *crucifixus*. Emendatur ex editis aliis et MSS.

⁴ Edili, *primum pertinere ad baptizandum*; omissa verbo, *credant, quod restituitur ex MSS.*

ubi disceret quemadmodum viveret. Cur ergo baptizandis vel Symbolum tradimus, reddendumque resuscimus? Nihil enim tale factum est erga illos quos per mare Rubrum Deus ab Aegyptiis liberavit. Si autem recte intelligunt hoc significari præcedentibus mysteriis de sanguine ovis postibus illito, et de azymis sinceritatis et veritatis (*Exod. XII-XIV*); cur non etiam illud consequenter intelligunt, ipsam ab Aegyptiis separationem significare discessionem a peccatis, quam baptizandi profitentur? Ad hoc enim pertinet quod a Petro dictum est, *Agite pœnitentiam, et baptizetur unusquisque vestrum in nomine Domini nostri Jesu Christi*: tanquam diceret, Recedite ab Aegypto; et per mare Rubrum transite. Unde et in Epistola quæ ad Hebræos inscribitur, cum eorum qui baptizantur commemorarentur initia, posita est ibi pœnitentia a mortuis operibus. Sic enim dicit: *Ideo remittentes initia Christi verbum, in consummationem respiciamus, non iterum jacientes fundamentum pœnitentiæ a mortuis operibus, et fidei in Deum, lavacri doctrinæ, impositionis manuum, resurrectionis etiam mortuorum et iudicii æterni* (*Hebr. vi, 1, 2*). Hæc igitur omnia pertinere ad initia neophytorum satis aperteque Scriptura testatur. Quid est autem a mortuis operibus pœnitentia, nisi ab his quæ oportet mortificari, ut vivamus? quæ si adulteria fornicationesque non sunt, quid jam inter opera mortua nominandum est? Sic autem non sufficit professio recessionis a talibus, nisi etiam lavacro regenerationis cuncta præterita, quæ velut persequuntur, peccata deleantur, sicut non sufficit Israëlitis recedere ab Aegypto, nisi ea quæ insequebatur hostium multitudo ejusdem maris fluminibus interiret, qui Dei populo transituro liberandoque patuerunt. Qui ergo profitetur ab adulterio nolle se mutare, quomodo per mare Rubrum ducetur, cum ab Aegypto adhuc recuset abscedere? Deinde non attendunt in ea lege, quæ post transitum maris Rubri illi populo data est, primum esse præceptum, *Non erunt tibi alii dii præter me. Non facies tibi idola, neque ullum simulacrum, quæcumque in cœlo sunt sursum, et quæcumque in terra deorsum, et quæcumque in aqua et sub terra; non adorabis ea, neque servies eis* (*Exod. XX, 4, 5*); et cetera ad hoc præceptum pertinentia. Affirment itaque isti, si volunt, contra ipsam suam assertionem, etiam de unius Dei cultu cavendaque idolatria, non adhuc baptizandis, sed jam baptizatis esse prædicandum: et non jam dicant, eis qui Baptismum percepturi sunt, fidem tantum quæ in Deum est intimandam, et post ejus Sacramenti perceptionem de moribus vitæ tanquam de secundo præcepto eos quod ad dilectionem proximi pertinet instruendos. Utrumque enim lex continet, quam post mare Rubrum tanquam post Baptismum populus accepit; nec ita facta est distributio præceptorum, ut ante illius maris transitum de cavenda idolatria plebs doceretur, et posteaquam transierunt, audirent honorandum patrem et matrem, non mœchandum, non occidendum, et cetera bona atque innocens conversationis humanæ.

CAPUT XII. — 18. *Incommode grave in adversa sententia.* Si ergo ita quisque veniat ad sancti lavacri petitionem, ut profiteatur se ab idolorum sacrificiis non recessurum, nisi forte postea quando placuerit, Baptismum tamen jam jamque deposeat, templumque Dei vivi se fieri flagaret, non solum cultor idolorum, verum etiam in aliquo tam nefario sacerdotio¹ perseverans; quæro ab istis utrum eum faciendum vel catechumenum censeant: quod procul dubio fieri non debere clamabunt. Neque enim aliud de illorum corde sentiendum est. Reddant itaque rationem secundum testimonia Scripturarum, quæ sic intelligenda putant, quo modo huic audeant contradicere, nec admittendum esse confirment reclamantem atque dicentem: Didici et veneror Christum crucifixum, credo Filium Dei esse Christum Jesum; non me ultra differas, nihil amplius jam requiras. Quos per Evangelium generabat Apostolus, nihil eos nosse tunc amplius quam Christum crucifixum volebat; post vocem Spadonis, qua se credere Jesum Christum Filium Dei esse respondit, continuo Philippus eum baptizare non distulit: quid me ab idolorum cultu prohibes, nec ad sacramentum Christi admittis, priusquam inde discessero? Illud a pueritia didici, consuetudine ibi gravissima premor: faciam cum potuero, cum commodum fuerit; quod etsi non faciam, non tamen sine Christi sacramento hanc vitam finiam, ne Deus exigit animam meam de manibus tuis. Quid huic respondendum existimant? An placet ut admittatur? Absit: nullo modo crediderim in tantum eos progredi. Quid ergo respondebunt haec dicenti, et addent quod nihil sibi de idolatria relinquenda saltem dici debuit ante Baptismum, sicut nihil inde ante mare Rubrum populus ille primus audivit, quoniam lex hoc habet, quam ex Ægypto jam liberatus accepit. Profecto dicuntur sunt homini: Templum Dei futurus es, cum Baptismum acceperis; dicit autem Apostolus, *Quæ compositio templo Dei cum idolis* (II Cor. vi, 16)? Quare ergo non vident similiter esse dicendum: Membrum Christi futurus es, cum acceperis Baptismum; non possunt membra Christi esse membra meretricis? Quia et hoc Apostolus dicit: qui et alio loco, *Nolite*, inquit, errare; neque fornicatores, neque idolis servientes, et cætera quæ illuc enumerat, *regnum Dei possidebunt*. Cur ergo ad Baptismum idolis servientes non admittimus, et fornicatores admittendos putamus, cum et his et cæteris malis dicat, *Et hæc quidam fuistis, sed abluti estis, sed sanctificati estis, sed justificati estis in nomine Domini Iesu Christi et in spiritu Dei nostri* (I Cor. vi, 15, 9, 10, 11)? Quid igitur causæ est ut cum potestas pateat utrumque prohibendi, venientem ad Baptismum permittam fornicarium permanere, et non permittam idolis servientem; cum et illis et illis dici audiam, *Et hæc quidam fuistis, sed abluti estis?* Sed eo moventur isti, quia putant esse in tuto salutem eorum, quamvis per

¹ sic melioris notæ MSS. Quidam addunt, *sacrilego*: alii autem pro, *sacerdotio*, habent, *scelere*. At editi, *sacrilegio*.

ignem, qui in Christum crediderint, Sacramentumque ejus acceperint, id est baptizati fuerint, etiamsi morum corrigendorum ita negligentes sint, ut nequiter vivant. Unde mox video, si Deus juverit, quid secundum Scripturas sentiendum sit.

CAPUT XIII. — 19. *Baptizandis præcepta morum a Joanne tradita.* Ad consequendam vitam æternam præcepta servari jussit Christus. Nunc in hac quæstione adhuc versor, in qua eis videtur baptizatos admonendos esse de moribus ad christianam vitam pertinentibus, baptizandis autem solam insinuandam fidem. Quod si ita esset, præter tam multa quæ diximus, non Joannes Baptista venientibus ad baptismum suum diceret, *Generatio viperarum, quis ostendit vobis fugere ab ira ventura? Facite ergo fructum dignum poenitentiarum* (Matth. iii, 7, 8); et cætera, quæ utique non de fide, sed de bonis operibus admonet. Unde et militibus dicentibus, *Quid faciemus?* non dixit, Interim credite et baptizamini, post audietis quid facere debeatis; sed ante dixit, ante præmonuit, ut venturo Domino in cor eorum tanquam præcursor mundaret viam: *Neminem concusseritis, nulli calumniam feceritis, sufficiat vobis stipendium vestrum.* Similiter publicanis quærentibus quid facere deberent, *Nihil amplius inquit, exigatis præter quam constitutum est vobis* (Luc. iii, 12-14). His breviter commemoratis, Evangelista (non enim totos catechismos inserere debuit) satis significavit pertinere ad eum a quo baptizandus catechizatur, docere et monere de moribus. Quod si respondissent Joanni, Prorsus non faciemus fructus dignos poenitentiarum, calumniaturi sumus, concussuri sumus, ea quæ nobis non debentur exacturi sumus, et nihilominus eos post hanc professionem baptizaret; nec sic tamen dici posset, unde modo quæstio est, non esse temporis cum quisque baptizandus est, ut prius illi sermo fiat quemadmodum vitam bonam agere debeat.

20. Quid ipse Dominus, ut alia omittam, cum ab eo dives ille quereret quid boni faceret ut vitam æternam consequeretur; recolant quid responderit: *Si vis venire, inquit, ad vitam, serva mandata.* At ille, *Quæ?* Tunc Dominus commemoravit præcepta Legis, *Non occides, Non mæchaberis, et cætera.* Ubi cum ille respondisset haec se fecisse a juventute sua, addidit etiam perfectionis præceptum, ut venditis suis omnibus et in pauperum eleemosynas erogatis habèret thesaurum in cœlo, et eundem Dominum sequeretur (Matth. xix, 17-21). Videant igitur non ei dictum esse ut crederet et baptizaretur, quo solo adjutorio putant isti venire hominem ad vitam; sed morum præcepta homini data, quæ utique sine fide custodiri observarique non possunt. Nec tamen quia hic de insinuanda fide Dominus videtur tacuisse, præscribimus nos atque contendimus, morum tantummodo præcepta dicenda esse hominibus ad vitam pervenire cupientibus. Utraque enim mutuo connexa sunt, sicut ante dixi; quia neque dilectio Dei potest esse in homine qui non diligit proximum, nec dilectio proximi in eo qui non diligit Deum. Ideo aliquando alterum sine altero, sive

illud, sive illud, pro plena doctrina invenitur Scriptura commemorare, ut etiam hoc modo intelligatur alterum sine altero esse non posse : quia et qui credit Deo, debet facere quod praecepit Deus ; et qui propterea facit quia praecepit Deus, necesse est ut credat Deo.

CAPUT XIV. — 21. *De tertia quæstione : quod fides ad salutem non sufficit sine operibus.* Quamobrem jam illud videamus, quod excludendum est a cordibus religiosis, ne mala securitate salutem suam perdant, si ad eam obtinendam sufficere fidem putaverint, bene autem vivere et bonis operibus viam Dei tenere neglexerint. Nam etiam temporibus Apostolorum non intellectis quibusdam subobscuris sententiis apostoli Pauli, hoc eum quidam arbitrati sunt dicere, *Faciamus mala, ut veniant bona* (*Rom. iii, 8*) ; quia dixerat, *Lex subintravit, ut abundaret delictum ; ubi autem abundavit delictum, superabundavit gratia* (*Rom. v, 20*). Quod ideo verum est, quia legem accipientes homines qui de suis viribus superbissime presumebant, nec divinum adjutorium vincendarum malarum concupiscentiarum recta fide impetrantes, pluribus gravioribusque delictis etiam lege prævaricata onerati sunt : ac sic magno reatu compellente confugerunt ad fidem, qua misericordiam indulgentiae mererentur, et auxilium a Domino qui fecit cœlum et terram (*Psalm. cxx, 2*) ; ut diffusa per Spiritum sanctum charitate in cordibus suis (*Rom. v, 5*), cum dilectione agerent quæ contra sæculi hujus concupiscentias juberentur, secundum id quod prædictum fuerat in Psalmo : *Multiplicatæ sunt infirmitates eorum ; postea acceleraverunt* (*Psalm. xv, 4*). Cum ergo dicit Apostolus arbitrari se justificari hominem per fidem sine operibus legis (*Rom. iv*) ; non hoc agit, ut percepta ac professa fide opera justitiae contemnatur, sed ut sciat se quisque per fidem posse justificari, etiamsi legis opera non præcesserint. Sequuntur enim justificatum, non præcedunt justicandum. Unde in præsenti opere non opus est latius disputare ; præsertim quia modo¹ de hac quæstione prolixum librum edidi, qui inscribitur, de Littera et Spiritu. Quoniam ergo hæc opinio tunc fuerat exorta, aliae apostolicæ Epistolæ, Petri, Joannis, Jacobi, Judæ, contra eam maxime dirigunt intentionem, ut vehementer astruant fidem sine operibus non prodesse : sicut etiam ipse Paulus, non qualemlibet fidem, qua in Deum creditur, sed eam salubrem planeque evangelicam definiuit, cuius opera ex dilectione procedunt : *Et fides, inquit, quæ per dilectionem operatur* (*Galat. v, 6*). Unde illam fidem quæ sufficere ad salutem quibusdam videtur, ita nihil prodesse asseverat, ut dicat : *Si habeam omnem fidem, ita ut montes transferam, charitatem autem non habeam, nihil sum* (*I Cor. XIII, 1*). Ubi autem fidelis charitas operatur², sine dubio bene vivitur. *Plenitudo enim legis charitas* (*Rom. XIII, 10*).

¹ Sex MSS. in quibus est Corbeiensis ante mille annos descriptus; particulam, modo, prætercunt.

² Casalinus liber, *Ubi autem fides est et charitas operatur.*

22. Unde evidenter in secundâ Epistola sua Petrus, cum ad vitæ et morum sanctitatem hortaretur, mundumque istum transitum prænuntiaret, cœlos vero nōvos et terram novam exspectari, quæ justis inhabitanda traderetur, ut ex hoc attenderent qualiter eos oporteret vivere, ut habitatione illa digni fierent ; sciens de apostoli Pauli quibusdam subobscuris sententiis nonnullos iniquos accepisse occasionem, ut tanquam securi de salute quæ in fide est, bene vivere non curarent, commemoravit quædam ad intelligendum difficultia esse in Epistolis ejus, quæ homines perverterent, sicut et alias Scripturas, ad proprium suum interitum : cum tamen et ille apostolus de salute æterna, quæ nisi bene viventibus non daretur, eadem sensiret, quæ cæteri apostoli. Sic itaque Petrus : *His ergo, inquit, omnibus pereuntibus, quales oportet vos esse in sanctis conversationibus et pietatibus, exspectantes et properantes ad præsentiam diei Domini, per quam cœli ardentes solventur, et elementa ardore ignis decoquuntur ? novos vero cœlos et terram novam secundum promissa ipsius exspectamus, in quibus justitia inhabitat. Quapropter, charissimi, hæc exspectantes satagit inviolati et immaculati apud eum reperiri in pace, et Domini nostri patientiam salutem existimare. Sicut et dilectissimus frater noster Paulus secundum eam, quæ data est illi, sapientiam scripsit vobis, ut et in omnibus Epistolis, loquens in eis de his : in quibus sunt difficultia quædam intellectu, quæ indocti et instabiles pervertunt, sicut et cæteras Scripturas, ad proprium suum interitum. Vos igitur, amantissimi, præscientes, cavete ne infaustorum¹ errore seducti decidatis a corroboratione vestra : crescere vero in gratia et intellectu Domini nostri et Salvatoris Jesu Christi. Ipsi gloria, et nunc et in diem æternitatis* (*II Petr. iii, 11-18*).

23. Jacobus autem tam vehementer infestus est eis qui sapiunt fidem sine operibus valere ad salutem, ut illos etiam dæmonibus comparet, dicens : *Tu credis quoniam unus est Deus : bene facis ; et dæmones credunt, et contremiscunt.* Quid brevius, verius, vehementius dici potuit, cum et in Evangelio legamus hoc dixisse dæmonia, cum Christum Filium Dei confitentur, et ab illo corriperentur (*Marc. i, 24, 25*), quod in Petri confessione laudatum est (*Matth. XVI, 16, 17*) ? *Quid proderit*, ait Jacobus, *fratres mei, si fidem dicat se quis habere, opera autem non habeat ? Numquid poterit fides salvare eum ?* Dicit etiam, *Quia fides sine operibus mortua est* (*Jacobi ii, 19, 14, 20*). Quousque ergo falluntur, qui de fide mortua sibi vitam perpetuam pollicentur ?

CAPUT XV. — 24. *Locus Apostoli difficultis, male intellectus. Refutatur opinio existimantium fidem sine operibus prodesse ad salutem.* Quapropter diligenter oportet attendere quomodo accipienda sit apostoli Pauli illa sententia, plane ad intelligendum difficultis, ubi ait : *Fundamentum enim aliud nemo potest ponere, præter id quod positum est, quod est Christus Jesus.* Si quis autem

¹ Sic tredecim MSS. At editi, *infaustorum*. Forte pro, *insulsorum*, quod melius respondet Vulgatae, *insipientium*. Sed in græco textu est, *athesmón*, *nefariorum*.

superaedificat super fundatum hoc, aurum, argentum, lapides pretiosos, ligna, fenum, stipulam, uniuscujusque opus manifestabitur. Dies enim¹ declarabit, quia in igne revelabitur, et uniuscujusque opus quale sit ignis probabit. Si cuius opus permanserit, quod superaedificavit, mercedem accipiet. Si cuius autem opus arserit, damnum patietur; ipse autem salvus erit; sic tamen quasi per ignem (I Cor. iii, 11-15). Quod quidam ita intelligendum putant, ut illi videantur aedificare super hoc fundatum, aurum, argentum, lapides pretiosos, qui fidei quae in Christo est, bona opera adjiciunt; illi autem fenum, ligna, stipulam, qui cum eamdem fidem habeant, male operantur. Unde arbitrantur per quasdam poenas ignis eos posse purgari ad salutem percipiendam merito fundamenti.

25. Hoc si ita est, fatemur istos laudabili charitate conari ut omnes indiscretè admittantur ad Baptismum, non solum adulteri et adulteræ, contra sententiam Domini falsas nuptias prætendentes; verum etiam publicæ meretrices in turpissimâ professione perseverantes, quas certe etiam nulla negligentissimâ Ecclesia consuevit admittere, nisi ab illa primitus prostitutione liberatas. Sed ista ratione cur non omni modo admittantur, omnino non video. Quis enim non malit eas posito fundamento, licet ligna, fenum et stipulam congerant, aliquanto certe diuturniore igne purgari, quam in æternum perire? Sed falsa erunt illa, quæ obscuritatem ambiguatemque non habent: *Si habeam omnem fidem, ita ut montes transferam, charitatem autem non habeam, nihil sum; et, Quid proderit, fratres mei, si fidem quis dicat se habere, opera autem non habeat? Numquid poterit fides salvare eum?* Falsum erit et illud: *Nolite errare; neque fornicatores, neque idolis servientes, neque fures, neque avari, neque adulteri, neque mollies, neque masculorum concubitores, neque ebriosi, neque maledici, neque rapaces regnum Dei possidebunt* (I Cor. vi, 9, 10). Falsum et illud: *Manifesta sunt opera carnis, quæ sunt fornicationes, immunditia, impudicitia, luxuria, idolorum servitus, veneficia, inimicitiae, contentiones, emulaciones, animositates, dissensiones, hereses, inuidiae, ebrietates, comessationes, et his similia, quæ prædico vobis, sicut et prædixi, quoniam qui talia agunt, regnum Dei non possidebunt* (Galat. v, 19-21). Falsa erunt hæc. Si enim tantummodo credant et baptizen-
tur, quamvis in malis talibus perseverent, salvi erunt per ignem: atque ideo in Christo baptizati, etiam qui talia agunt, regnum Dei possidebunt. Frustra autem dicitur, *Et hæc quidam fuistis², sed abluti estis* (I Cor. vi, 11); quando et abluti hæc sunt. Inaniter etiam illud a Petro dictum videbitur, *Sic et vos simili forma Baptisma salvos facit, non carnis depositio sordium, sed conscientiae bonæ interrogatio* (I Petr. iii, 21); siquidem et habentes pessimas conscientias omnium flagitorum et scelerum plenas, nec eorum malorum pœnitentia mutatas, tamen Baptisma salvos facit præpter funda-

¹ Editi, dies enim Domini. Abest; Domini; a MSS. et a græco textu Apostoli.

² Editi, *Et hæc quidem fuistis*. At melioris notæ MSS., *quidam*; juxta græcum; ibidem. Sic olim in latinis bibliis editionis Vulgatae, emendatum fuisse liquet ex Luca Brugensi, Lib. de locis Romanæ correctionis jussu Sixti V.

mentum enim quod in eodem Baptismate ponitur, licet per ignem, salvi erunt. Illud quoque non video cur Dominus dixerit, *Si vis venire ad vitam, serva mandata, et commemoravit ea quæ ad bonos mores pertinet* (Matth. xix, 17-19); si etiam his non servatis ad vitam veniri potest per solam fidem, que sine operibus mortua est. Illud deinde quomodo verum erit, quod eis quos ad sinistram positurus est dicet: *Ite in ignem æternum, qui paratus est diabolò et angelis ejus?* Quos non increpat³ quia in eum non crediderunt, sed quia bona opera non fecerunt. Nam profecto ne sibi quisquam de fide, quæ sine operibus mortua est, vitam promittat æternam, propterea omnes gentes segregaturum se dixit, quæ permixtæ eisdem passibus uterbahtur, ut appareat eos illi dicturos, *Domine, quando te vidimus illa et illa patientem, et non ministravimus tibi?* qui in eum crediderant, sed bona operari non curaverant, tanquam de ipsa fide mortua ad vitam perveniretur æternam. An forte ibunt in ignem æternum qui opera misericordiae non fecerunt, et non ibunt qui aliena rapuerunt, vel corrumperendo in se templum Dei in seipsos immisericordes fuerunt; quasi opera misericordiae prosint aliquid sine dilectione; dicente Apóstolo, *Si distribuam omnia mea pauperibus, charitatem autem non habeam, nihil mihi prodest* (I Cor. xiii, 3); aut diligit quisquam proximum sicut se ipsum, qui non diligit se ipsum? Qui enim diligit iniuriam, odit amicam suam (Psal. x, 6). Neque illud dici hic poterit, in quo nonnulli se ipsos seducunt dicentes, ignem æternum dictum, non ipsam pœnam æternam⁴: per ignem quippe, qui æternus erit, transituros arbitrabitur eos quibus propter fidem mortuam per ignem promittunt salutem; ut videlicet ipse ignis æternus sit, combustio vero eorum, hoc est operatio ignis, non sit in eos æternæ: cum et hoc prævidens Dominus, tanquam Dominus, sententiam suam ita concluserit, dicens, *Sic ibunt illi in combustionem æternam, justi autem in vitam æternam* (Matth. xxv, 52, 53; 41-46). Erit ergo æterna combustio, sicut ignis; et eos in illum ituros Veritas dixit, quorum non fidei, sed bona opera defuisse declaravit.

26. Si ergo hæc opinia, et cætera quæ innihilerrabilia per omnes Scripturas sine ambiguitate dicta repertiri possunt, falsa erunt; poterit verus esse ille intellectus de lignis, feno et stipula, quod hi salvi erunt per ignem, qui solam in Christum fidem tenentes bona opera negligenterunt. Si autem ista et vera, et clara sunt; procul dubio in illa Apostoli sententia aliis requirendus est intellectus, atque in his depudiana est, quæ Petrus dicit esse in scriptis ejus quedam difficultas intellectu, quæ non debenti homines perverttere ad proprium suum interitum; ut contrærévidentissima testimonia Scripturarum securos faciant de percipienda salute nequissimos, nequitiae suæ per-

¹ Plerique MSS., *Quibus non increpat*; vel, *increpitat*.

² Tres melioris notæ MSS., *pastoribus*.

³ In MSS. plerisque, *pœnam æternam*. At in editis, *combustionem æternam*.

⁴ MSS., *quam*.

tinacissime cohaerentes, nec emendando aut pœnitendo mutatos.

CAPUT XVI. — 27. *Locus Apostoli quomodo intelligendus. Alius Apostoli locus frustra ab iis adductus, qui fidem sine operibus salvare docent. Chananae fides qualis laudata est.* Hic a me fortasse queratur, de ipsa Pauli apostoli sententia quid ego sentiam, et quoniam modo intelligendam putem. Fateor, hinc¹ mallem audire intelligentiores atque doctiores, qui sic eam exponant, ut illa omnia vera et inconcussa permaneant, quæ supra commemoravi, et quæcumque alia non commmemoravi, quibus apertissime Scriptura testatur nihil prodesse fidem, nisi eam quam definiuit Apostolus, id est, quæ per dilectionem operatur (*Galat. v, 6*); sine operibus autem salvare non posse, neque præter ignem, neque per ignem: quia si per ignem salvat ipsa utique salvat. Absolute autem dictum est et aperite, *Quid prodest, si dicat quis se fidem habere, opera autem non habeat? Numquid poterit fides salvare eum?* Dicam tamen, quam brevissime potero, etiam ipse quid sentiam de illa sententia Pauli apostoli ad intelligendum difficulti; dummodo illud, quod ad meam professionem attinet², præcipue teneatur, quod de hac me malle dixi audire meliores. Fundamentum Christus est in structura architecti sapientis; hoc expositione non indiget: aperite enim dictum est, *Fundamentum enim aliud nemo potest ponere præter id quod positum est, quod est Christus Jesus.* Si autem Christus, procul dubio fides Christi: per fidem quippe habitat Christus in cordibus nostris, sicut idem apostolus dicit (*Ephes. iii, 17*). Porro si fides Christi, illa utique quam definiuit Apostolus, quæ per dilectionem operatur. Non enim fides illa dæmonum, cum et ipsi credant et contremiscant, et Filium Dei confiteantur Jesum, potest accipi in fundamento. Quare, nisi quia non est fides quæ per dilectionem operatur, sed quæ exprimitur per timorem? Fides itaque Christi, fides gratiæ christianæ, id est, ea fides quæ per dilectionem operatur posita in fundamento neminem perire permittit. Sed quid sit ædificare super hoc fundamentum, aurum, argentum, lapides pretiosos, et ligna, fenum, stipulam, si subtilius disserere coner, vereor ne ad intelligendum difficultior sit ipsa expositio: enitar tamen, quantum Dominus adjuvat, et breviter, et quantum potero, dilucide expedire quod sentio. Ecce ille qui quæsivit a magistro bono, quid boni facheret, ut haberet vitam æternam; et audivit, si ad vitam venire vellet, servanda sibi esse mandata: et cum quereret quæ mandata, dictum est ei, *Non occides, Non mæchaberis, Non furtum facies, Non falsum testimonium dices, Honora patrem tuum et matrem tuam; et, Diliges proximum tuum tanquam te ipsum.* Hæc faciens in fide Christi, teneret procul dubio fidem quæ per dilectionem operatur. Neque enim diligenter proximum tanquam se ipsum, nisi recepta dilectione Dei, sine qua non diligenter se ipsum. Porro si facheret etiam quod Dominus

addidit, dicens, *Si vis perfectus esse, vade, vende omnia quæ habes, et da pauperibus, et habebis thesaurum in cœlo; et veni, sequere me* (*Matth. xix, 16-21*); ædificaret super illud fundamentum, aurum, argentum, lapides pretiosos: non enim cogitaret, nisi quæ sunt Dei, quomodo placeret Deo; et hæ cogitationes sunt, quantum existimo, aurum, argentum, lapides pretiosi. Porro si circa divitias suas carnali quodam teneretur affectu, quamvis ex eis multas eleemosynas faceret, nec ad eas augendas fraudis aliquid rapinæque moliretur, aut earum minuendarum vel amittendarum metu in aliquod facinus flagitiumve laberetur (alioquin jam se isto modo ab illius fundamenti stabilitate subtraheret), sed propter carnalem, ut dixi, quem in eis haberet affectum, quo talibus bonis sine dolore carere non posset; ædificaret super fundamentum illud ligna, fenum, stipulam: maxime si et uxorem sic haberet, ut etiam propter ipsam cogitaret ea quæ sunt mundi, quomodo placeret uxori. Hæc igitur quoniam affectu dilecta carnali non sine dolore amittuntur, propterea qui ea sic habent, ut habeant in fundamento fidem quæ per dilectionem operatur, neque huic ista ulla ratione vel cupiditate præponant, in eorum amissione passi detrimentum, per ignem quemdam doloris perveniunt ad salutem. A quo dolore atque detimento tanto est quisque securior, quanto ea vel minus amaverit, vel tanquam non habens habuerit. Qui vero propter illa vel tenenda vel adipiscenda, homicidium, adulterium, fornicationem, idolatriam, et similia quæque commiserit, non propter fundatum per ignem salvabitur, sed amissso fundamento, æterno igne torquebitur.

28. Quamobrem et illud quod dicunt, veluti probare cupientes quantum valeat sola fides, ubi Apostolus dicit, *Quod si infidelis discedit, discedat; non est enim servituti subjectus frater vel soror in hujusmodi* (*I Cor. vii, 15*); id est, ut propter fidem Christi etiam ipsa uxor legitima societate conjuncta, sine ultra culpa relinquatur, si cum viro christiano, propter hoc quia christianus est, permanere noluerit: non attendunt eo modo illam rectissime dimitti, si viro suo dicat, *Non ero uxor tua, nisi mihi vel de latrocino divitias coperas, aut nisi solita lenocinia, quibus nostram domum transigebas, etiam christianus exerceas;* aut si quid aliud vel facinorosum vel flagitosum in viro noverat³, quo delectata vel libidinem explebat, vel facilem victum habebat, vel etiam incedebat oratione. Tunc enim ille cui hoc uxor dicit, si veraciter egit pœnitentiam ab operibus mortuis, quando accessit ad Baptismum, habetque in fundamento fidem quæ per dilectionem operatur, procul dubio plus tenebitur amore divinæ gratiæ, quam carnis uoriæ, et membrum quod eum scandalizat, fortiter amputat. Quemcumque autem in hac diremptione dolorem cordis propter carnalem affectum conjugis sustinebit, hoc est detrimentum quod patietur, hic est ignis per quem feno ardente ipse salvabitur. Si autem jam sic habebat uoxem tanquam non habens, non

¹ Apud Er. Lugd. Ven. Lov., hic. M.

² Editi, quod ad meam promissionem attinet. Concinnius MSS., quod ad meam professionem attinet.

³ Remensis Ms., virum agere noverat.

247 propter concupiscentiam, sed propter misericordiam, ne forte eam salvam faceret, reddens potius quam exigens debitum conjugale; profecto nec dolebit carnaliter, cum ab illo tale connubium separabitur: neque enim in ea¹ cogitabat, nisi quæ sunt Dei, quomodo placeret Deo (*Ibid.* 29-34). Ac per hoc in quantum aurum, argentum, et lapides pretiosos illis cogitationibus superaedificabat, in tantum detrimentum nullum pateretur, in tantum ejus structura, quæ non erat fenea, nullo incendio cremaretur.

29. Sive ergo in hac tantum vita ista homines patiuntur, sive etiam post hanc vitam talia quædam judicia subsequuntur, non abhorret, quantum arbitrator, a ratione veritatis iste intellectus hujusce sententiae. Verumtamen etiam si est aliis, qui mihi non occurrit, potius eligendus; istum quamdiu tenemus, non cogimur dicere injustis, non subditis, scelestis, contaminatis, parricidis, matricidis, homicidis, fornicatoribus, masculorum concubitoribus, plagiariis, mendacibus, perjuris, et si quid aliud sanæ doctrinæ adversatur, quæ est secundum Evangelium gloriae beati Dei (*I Tim.* 1, 9-11): Si tantummodo in Christum credatis, et sacramentum Baptismi ejus accipiatis, etiamsi vitam istam pessimam non mutaveritis, salvi eritis.

30. Unde nec illa nobis mulier Chananæa præscribit, quia Dominus ei quod petebat dedit, cum ante dixisset, *Non est bonum tollere panem filiorum, et mittere canibus*; quia ille cordis inspector mutatam vidit, quando laudavit. Et ideo non ait, *O canis, magna est fides tua!* sed, *O mulier, magna est fides tua* (*Matth.* xv, 26, 28)! Mutavit vocabulum, quia mutatum vidit affectum, atque illam correptionem ad fructum pervenisse cognovit. Miror autem si laudaret in ea fidem sine operibus; id est, fidem non talem quæ jam per dilectionem posset operari, fidem mortuam, et quod Jacobus dicere minime dubitavit, fidem non Christianorum, sed dæmonum. Postremo si istam Chananæam nolunt intelligere mutasse perditos mores, quando eam Christus contemnendo et corripiendo redarguit: quoscumque invenerint tantummodo credere, vitam vero inquinatissimam, nec saltem occultare, sed etiam libere profiteri, ac nolle mutare; sanent filios eorum, si possunt, sicut sanata est filia Chananææ mulieris; non tamen eos faciant membra Christi, cum ipsi esse non desinant membra meretricis. Illud sane non absurde intelligunt, eum peccare in Spiritum sanctum, et esse sine venia reum aeterni peccati, qui usque in finem vitæ noluerit credere in Christum: sed si recte intelligerent, quid sit credere in Christum. Non enim hoc est habere dæmonum fidem, quæ recte mortua prohibetur; sed fidem quæ per dilectionem operatur.

CAPUT XVII. — 31. *Argumentum frustra ductum ex parabolis zizaniorum et adductorum ad convivium pro obstinatis in peccato admittendis ad Baptismum Similitudo servi nolentis erogare talentum ad eanidem*

¹ Sic MSS. At editi, *tali conjugio separabitur: neque enim in eo.*

rem inutilis. Quæ cum ita sint, quando tales ad Baptismum non admittimus, non ante tempus zizania evellere conamur, sed nolumus insuper, sicut diabolus, zizania seminare: nèc ad Christum volentes venire prohibemus, sed eos ad Christum venire nolle, ipsa sua professione convincimus: nec vetamus Christo credere, sed demonstramus eos nolle Christo credere, qui vel adulteriū dicunt non esse quod ille adulterium dicit esse, vel credunt adulteros ejus membra posse esse, quos per Apostolum dicit regnum Dei non possidere, et sanæ doctrinæ adversari, quæ est secundum Evangelium gloriae beati Dei. Unde non sunt isti inter eos deputandi, qui ad convivium nuptiarum venerunt; sed inter eos qui venire noluerunt. Cum enim ipsi doctrinæ Christi audent aperiissime contradicere, et sancto adversari Evangelio, non venientes repelluntur, sed venire contemnunt. Qui autem sæculo saltem verbis, etiamsi non factis, renuntiant, veniunt quidem, et inter triticum semiñantur, et in aream congeruntur, et ovibus aggregantur, et retia subeunt, et convivantibus admiscentur; sed intus sive lateant, si ve pareant, tunc erit ratio tolerandi si potestas nulla est corrigendi, nec debet esse præsumptio separandi. Absit autem ut sic intelligamus quod scriptum est, ad convivium nuptiarum adductos, *quos invenerunt bonos et malos* (*Matth.* xxii, 2-10), ut eos adduxisse credantur, qui se malos perseveraturos professi sunt. Alioquin ipsi servi patrisfamilias zizania seminaverunt, falsumque erit illud. *Inimicus autem qui ea seminavit, diabolus est* (*Id. XIII*, 39). Sed quia hoc falsum esse non potest, adduxerunt servi bonos et malos, sive qui laterent, sive qui jam adducti, et intromissi apparerent; sive *bonos et malos* dictum est secundum quamdam humanam conversationem, in qua etiam ii qui nondum crediderunt, vel laudari vel vituperari solent. Unde est etiam et illud quod Dominus monet discipulos, quos ad Evangelium prædicandum primitus mittit, ut in quacumque venerint civitatem, querant quis illuc dignus sit, ut apud eum habitent, donec inde proficiantur (*Id. x, 11*). Profecto ille dignus quis erit, nisi qui existimatione suorum civium bonus habebitur? et quis indignus, nisi qui eis malus innotuerit? Ex hoc utroque genere veniunt ad Christi fidem, et sic adducuntur boni et mali: quia et illi mali a mortuis operibus poenitentiam non recusant. Si autem recusant, non intrare cupientes repelluntur, sed ab introitu ipsi aperta contradictione discedunt.

32. Erit ergo et servus ille securus, nec inter pigros damnabitur, quod dominicum talentum noluerit erogare; quandoquidem illi noluerunt quod erogabat acciperé. Propter illos enim hæc similitudo proposita est. (*Id. xxv, 14-30*), qui nolunt suscipere in Ecclesia dispensatoris officium, desidiosam prætententes excusationem, nolle se rationem reddere de peccatis alienis; qui audiunt et non faciunt, id est, accipiunt et non reddunt. Cum vero dispensator fidelis et diligens, in erogando paratissimus, et

lucorum dominicorum avidissimus, dicit adultero, Noli esse adulter, si vis baptizari; crede Christo, qui hoc quod facis dicit esse adulterium, si vis baptizari; noli esse membrum meretricis, si vis fieri membrum Christi: ille autem respondet, Non obedio, non facio: ipse non vult veram pecuniam dominicam accipere, sed suam potius adulterinam vult thesauris dominicis importare. Si autem se facturum profiteretur, nec ficeret, nec postea quolibet modo corrigi posset; inveniretur quid de illo fieret, ne aliis inutilis esset, qui sibi utilis esse non posset: ut si intra retia Domini bona piscis malus esset, non tamen pisces Domini sui malis retibus irretiret; hoc est, ut si haberet in Ecclesia vitam malam, non tamen illic institueret doctrinam malam. Cum enim tales facta sua talia defendunt, vel in eis se perseveraturos apertissime profitentes admittuntur ad Baptismum; nihil videtur aliud praedicari¹, nisi fornicatores et adulteros etiam usque in vita hujus finem in ea nequitia permanentes, regnum Dei possessuros, et merito fidei, quae sine operibus mortua est, ad vitam aeternam salutemque venturos. Hæc sunt mala retia, quæ cavere debent præcipue piscatores: si tamen illa evangeliæ similitudinē piscatores episcopi, vel inferioris ordinis Ecclesiarum præpositi intelligendi sunt; quia dictum est, *Venite, et faciam vos piscatores hominum* (*Math. iv, 19*): Reribus enim bonis capi possunt pisces et boni et mali; reribus autem malis capi non possunt pisces boni. Quoniam in doctrina bona et bonus potest esse qui audit et facit, et manus qui audit et non facit: in doctrina vero mala, et qui eam veram pulat, quamvis ei hon obtineret, malus est; et qui obtinperat, pejor est.

CAPUT XVIII.—33. *Prohiberi perlitaces malos a Baptismo non novum*. Illud sane mirabile est, quod fratres qui aliter sapiunt, cum debeant ab ista vel nova vel vetere, pernicioſa tamen opinione discedere, ipsi insuper dicunt novam esse doctrinam, qua nequissimi homines in suis flagitiis se perseveraturos in proprio profito profitentes non admittuntur ad Baptismum: quasi nescio ubi peregrinentur, quando meretrices et liatriones, et quilibet alii publicæ turpitudinis professores, nisi solutis aut disruptis talibus vinculis, ad christiana sacramenta non permittuntur accedere; qui utique secundum istorum sententiam omnes admitterentur, nisi antiquum et robustum morem sancta Ecclesia retineret, ex illa scilicet liquidissima veritate venientem, qua certum habet, quoniam qui talia agunt, regnum Dei non possidebunt (*Galat. v, 19-21*, et *I Cor. vi, 9, 10*). Et nisi egerint ab his mortuis operibus penitentiam, accederé ad Baptismum non sinuntur: si autem subrepserint, nisi vel postea mutati egerint², salvi esse non possunt. Sed ebriosi, avari, maledici, et si quæ alia vitia damnabilia aperi factis convinci redarguique non possunt; præcepitis tamen et catechismis validissime flagellantur, atque omnes tales mutata in melius voluntate ad

Baptismum videntur accedere. Sed si forte adulteros, quos non lex humana, sed divina condemnat, id est, qui alienas uxores tanquam suas habent; vel feminas quæ alienos maritos, alicubi negligenter admitti solere adverterunt; ex illis rectis debent conari ista corriger, hoc est, ut etiam isti non admittantur; non ex his prævis illa recta depravare, ut neque de morum correctione catechizandos esse censeant Competentes; et consequenter omnes etiam illarum publicarum turpitudinum et scelerum professores, hoc est, meretrices, lenones, gladiatores, ac si quid hujusmodi est, etiam in illis malis permanentes, admitti optere arbitrentur. Omnia quippe illa quæ Apostolus enumerat, concludens, quoniam qui talia agunt, regnum Dei non possidebunt; qui vellementius agunt, manifestata sibi congruenter increpant³, et resistentes atque in eis se permanentes profitentes ad accipiendum Baptismum non admittunt.

CAPUT XIX.—34. *Tria flagitia etiam benigniorum hominum consensu mortifera et excommunicatione punienda. Unde factum ut de adulterinis conjugiis non ageretur in catechismis. Matrimonium cum infidelibus.* Qui autem opinantur cetera eleemosynis facile compensari, tria tamen mortifera esse non dubitant et excommunicationibus punienda, donec poenitentia humiliore sanentur, impudicitiam, idolatriam, homicidium. Neque nunc opus est querere qualis sit eorum ista sententia, et utrum corrigenda, an approbanda, ne opus susceptum mittamus in longum propter eam questionem, quæ huic absolvendæ minime necessaria est. Sufficit enim, quia si omnia non sunt admittenda ad Baptismi sacramentum, inter haec omnia est adulterium: si autem tria illa sola excienda sunt, etiam in his tribus est adulterium, unde ista disputatio nata est⁴.

35. Sed quoniam malorum christianorum mores, qui fuerunt antea etiam pessimi, habuisse non videntur hoc malum, ut alienas uxores ducerent viri, aut alienis viris feminæ nuberent; inde fortasse apud quasdam Ecclesias negligentia ista subrepsit, ut in catechismis Compotentium nec quererentur nec persecuterentur⁵ hæc vitia; atque inde factum est, ut inciperent et defendi: quæ tamen in baptizatis rara sunt adhuc, si ea nos negligendo non densa⁶ faciamus: Talem quippe in quibusdam negligentiam, in aliis impunitam, in aliis ignorantiam probabiliter Dominus somni nomine significasse intelligitur, ubi ait: *Cum tuum dormirent homines, venit inimicus, et superseminavit zizania* (*Matth. xiii, 25*). Hinc autem existimandum est non ea primum apparuisse in mōribus quamvis malorum christianorum, quoniam beatus Cyprianus in epistola de Lapsis, cum deplorando et arguendo multa commemoraret, quibus merito dicit indignationem Dei fuisse commotam; ut intolerabili

¹ Plerique MSS., manifesta sibi congruenter increpant.

² Am. Er. et duo MSS., absolvendo.

³ Sic MSS. Editio vero, mota est.

⁴ Sic MSS. At editio, repercuerentur.

⁵ Editio, defensa. Erratum corrigunt veteres libri.

¹ Ita MSS. Editio autem, nihil videntur aliud praedicare.

² Apud Er. Lugd. Ven et Lov., egerint penitentiam. M.

persecutione Ecclesiam suam sineret flagellari; hæc ibi omnino non nominat: cùm etiam illud non taceat, et ad eosdem mores malos pertinere confirmet, jungere cum infidelibus vinculum matrimonii, nihil aliud esse asserens, quam prostituere Gentilibus membra Christi: quæ nostris temporibus jam non putantur esse peccata; quoniam revera in Novo Testamento nihil inde præceptum est; et ideo aut licere creditum est; aut velut dubium derelictum. Sicut etiam illud ambiguum est, utrum Herodes mortui duxerit, an vivi fratris uxorem (^a): ei ideo non ita claret, quid Joannes ei non licere dicebat (*Matth. xiv*, 5, 4). De concubina quóqué, si professā fuerit nullum se alium cognituram, etiamsi ab illo cui subdita est dimittatur, merito dubitalur utrum ad percipiendum Baptismum non débeat admitti. Quisquis etiam uxorem in adulterio deprehensam dimiserit, et aliām duxerit, non videtur æquandus eis qui excepta causa adulterii dimittunt et dueunt: et in ipsis divinis sententiis ita obscurum est utrum et iste; cui quidem sine dubio adulteram licet dimittere, adulter tamen habeatur si alteram duxerit, ut quantum existimo, venialiter ibi quisque fallatur. Quamobrem quæ manifesta sunt impudicitiae crimina, omni modo a Baptismo prohibenda sunt, nisi mutatione voluntatis et poenitentia corriganter; quæ autem dubia, omni modo conandum est ne fiant tales conjunctiones. Quid enim opus est in tantum discriminem ambiguitatis caput mittere? Si autem factæ fuerint, nescio utrum ii qui fecerint, similiter ad Baptismum non debere videantur admitti.

CAPUT XX.—56. *Ordo curationis erga baptizandos tenendus.* Quantum attinet igitur ad doctrinam salubrem veritatis, ne cuiquam mortifero peccato perniciossima securitas detur, vel etiam pestilentiosissima tribuatur auctoritas; iste curationis ordo est, ut baptizandi credant in Deum Patrem et Filium et Spiritum sanctum, eo ritu quo Symbolum traditur; et a mortuis operibus agant poenitentiam, omniumque se omnino præteriorum remissionem in Baptismo accepturos esse non dubitent: non ut peccare liceat, sed ut peccasse non noceat; ut si facti remissio, non permissione facienda. Tunc vere dici potest, etiam spiritualiter, *Eccè sanus factus es, jam noli peccare* (*Joan. v*, 14): quod Dominus de corporali sanitate ideo dixit, quoniam sciebat ei quem salvum fecerat, meritis peccatorum illum etiam carnis accidisse languorem. Hi autem ei homini qui et baptizandus adulter ingreditur, et baptizatus adulter egreditur, miror quomodo dici existimenter; *Ecce sanus factus es.* Quis enim gravis et exitibilis morbus erit, si adulterium sanitas erit?

CAPUT XXI.—57. *Apostolorum factum non iis favere qui volunt adulteros admitti ad Baptismum.* Perperam dici *Judeos propter solam infidelitatem deletos.* *Regnum cœlorum vim pati non dictum de fide sine charitate.* Sed in tribus millibus; inquiunt; quos uno die

(a) Fratris viventis uxorem duxisse tradit Josephus, Antiq. Jud. lib. 48, cap. 7; idque in celebritate Decoll. S. Joannis canitur in Breviario Romano.

Apostoli baptizarunt, et in tot millibus credentium, in quibus Apostolus ab Jerusalem usque in Illyricum Evangelium replevit (*Rom. xv*, 19), erant utique aliqui alienis uxoribus copulati, vel feminæ alienis maritis: in quibus regulam Apostoli constitueré debuerunt, quæ deinceps in Ecclesiis servaretur, utrum non admitterentur ad Baptismum, nisi illa adulteria correxisserent. Quasi non similiter adversus eos dici possit quod non inveniunt aliquem commemoratum, qui cum talis esset, admissus est. Aut vero possint singulorum hominum crima, quod infinitum erat, commemorari; cum generalis illa regula satis superque sufficiat, ubi Petrus pluribus verbis testificans baptizandis ait, *Eripite vos ab hoc sæculo pravo* (*Act. ii*, 40, 41). Quis enim dubitet ad hujus sæculi pravitatem adulteria pertinere, et illos qui elegerint in eadem iniquitate persistere? Similiter autem dici potest publicas meretrices, quas utique ad Baptismum, nisi ab illa turpitudine liberatas, nulla admittit Ecclesia, potuisse inveniri in tot millibus tunc credentium per tot gentes, et de his suscipiendis vel prohibendis constituere Apostolos exempla debuisse. Verumtamen de quibusdam minoribus possumus conjectare majora. Si enim ad baptismum Joannis venientes publicani prohibiti sunt aliquil amplius exigere, quam quod eis fuerat constitutum (*Luc. iii*, 13); miror si venientibus ad baptismum Christi posset permitti adulterium.

58. Commemoraverunt etiam Israelitas multa mala et gravia perpetrasse, et effusisse multum sanguinem prophetarum, nec tamen ex his factis penitus meruisse deleri, sed ex infidelitate sola, qua in Christum credere noluerunt: non intuentes quia peccatum eorum non hoc solum fuit, quia in Christum non crediderunt, verum etiam quia Christum occiderunt; quorum unum pertinet ad crimen incredulitatis, alterum ad crimen crudelitatis. Illud ergo est contra fidem rectam; istud contra bonam vitam. Utrōque autem yitio caret qui fidem Christi habet, non sine operibus mortuam, quæ etiam in dæmonibus inventitur (*Jacobi ii*, 20; 19); sed fidem gratiae, quæ per dilectionem operatur (*Galat. v*, 6):

59. Hæc est fides de qua dicitur; *Regnum cœlorum intra vos est* (*Luc. xvii*, 21). Hoc enim diripiunt¹ qui vim faciunt credendo, impetrantes Spiritum charitatis, ubi est plenitudo legis (*Rom. xiii*, 40), sine qua lex in littera reos faciebat etiam prævaricationis. Non itaque putandum est ideo dictum, *Regnum cœlorum vim patitur, et qui vim faciunt, diripiunt illud* (*Matth. xi*, 12); quia etiam mali tantummodo credendo et pessime vivendo perveniunt in regnum cœlorum: sed quia reatus ille prævaricationis, quem sola lex, id est, littera sine spiritu jubendo faciebat, credendo solvit, et violentia fidei Spiritus sanctus impetratur; per quem diffusa charitate in cordibus nostris (*Rom. v*, 5), lex non timore poenæ, sed justitiae amore completur.

¹ In editis, *Hanc enim diripiunt.* At in MSS., *Hoc enim diripiunt.*

CAPUT XXII. — 40. *Cognitio Dei quænam vera et ad vitam æternam conducens. Indulgentia non obstinatis, sed a peccato recedentibus speranda. Nequaquam ergo mens incauta fallatur, ut se existimet Deum cognovisse, si eum fide mortua, hoc est, sine bonis operibus confiteatur, more dæmonum; et ideo se jam non dubitet ad vitam æternam esse venturam, quia Dominus dicit, *Hæc est autem vita æterna, ut cognoscant te unum verum Deum, et quem misisti Iesum Christum* (Joan. xvii, 5). Venire quippe debet etiam illud in mentem, quod scriptum est, *In hoc cognoscimus eum, si mandata ejus servemus. Qui dicit, Quia cognovi eum, et mandata ejus non servat, mendax est, et in hoc veritas non est* (I Joan. ii, 3, 4). Et ne quisquam existimet mandata ejus ad solam fidem pertinere: quanquam dicere hoc nullus est ausus, præsertim quia *mandata dixit*, quæ ne multitudine cogitationem spargerent¹, *In illis duobus tota Lex pendet et Prophetae* (Matth. xxii, 40): licet recte dici possit ad solam fidem pertinere Dei mandata, si non mortua, sed viva illa intelligatur fides, quæ per dilectionem operatur; tamen postea Joannes ipse aperuit quid diceret, cum ait: *Hoc est mandatum ejus, ut credamus nomini Filii ejus Iesu Christi, et diligamus invicem* (I Joan. iii, 23).*

41. Hoc itaque prodest, in Deum recta fide credere, Deum colere, Deum nosse, ut et bene vivendi ab illo sit nobis auxilium, et si peccaverimus, ab illo indulgentiam mereamur; non in factis quæ odi securi perseverantes, sed ab eis recedentes, eique dicentes, *Ego dixi, Domine, miserere mei; sana animam meam, quoniam peccavi tibi* (Psal. xl, 5): quod non habent cui dicant, qui non in eum credunt; et frustra dicunt qui cum tam longe ab illo sint, a gratia Mediatoris alieni sunt. Hinc illa verba sunt in libro Sapientiæ, quæ nescio quomodo intelligit perniciosa securitas: *Et si peccaverimus, tui sumus; quoniam scilicet bonum et magnum Dominum habemus, qui et velit atque possit poenitentium peccata sanare, non qui minime audeat permanentes in malignitate disperdere. Denique cum dixisset, tui sumus; addidit, scientes potentiam tuam: utique potentiam, cui se subtrahere nequeat aut occultare peccator. Ideoque secutus adjunxit: Non peccabimus autem, scientes quoniam tui sumus deputati* (Sap. xv, 2). Quis enim digne cogitans habitationem apud Deum, in qua omnes prædestinatione sunt deputati, qui secundum propositum vocati sunt, non emitatur ita vivere, ut tali habitationi congruat? Quod ergo et Joannes dicit, *Hæc scripsi vobis, ut non peccetis; et si quis peccaverit, advocatum habemus apud Patrem, Iesum Christum justum; et ipse est exoratio pro peccatis nostris* (I Joan. ii, 1, 2): non id agit², ut cum securitate peccemus; sed ut recedentes a peccato, si quod admissum est, propter illum advocationem, quem non habent infideles, minime de indulgentia desperemus.

CAPUT XXIII. — 42. *Locus Apostoli ab adversariis*

¹ Sic MSS. Editi vero, *cogitationes parerent.*

² Editi, ait; pro quo MSS., agit.

male intellectus. Judicium in Scripturis pro æterna damnatione. An soli fideles mali intelligendi sint ituri in resurrectionem judicii, ut judicium non sit æterna damnatio. Nec de his igitur verbis mitior ulla conditio promittenda est, sic in Deum credere volentibus, ut permaneant in perditis moribus: multo minus de illis ubi Apostolus ait, Qui sine Lege peccaverunt, sine Lege peribunt; qui autem in Lege peccaverunt, per Legem judicabuntur (Rom. ii, 12); tanquam hoc loco aliquid distet inter perire et judicari, cum alio verbo hoc idem significatum sit. Solent enim Scripturæ judicium etiam pro æterna damnatione ponere: sicut in Evangelio Dominus loquitur, *Veniet hora, in qua omnes qui sunt in monumentis audient vocem ejus; et procedent qui bene fecerunt in resurrectionem vitæ; qui autem male egerunt in resurrectionem judicii* (Joan. v, 28, 29). Neque hic¹ dictum est, Hoc qui crediderunt, illud autem qui non crediderunt; sed, *Hoc illi qui bene egerunt, illud qui male egerunt.* Inseparabilis est quippe bona vita a fide quæ per dilectionem operatur; imo vero ea ipsa est bona vita. Videmus itaque resurrectionem judicii dixisse Dominum pro resurrectione damnationis æternæ. De omnibus quippe resurrecturis (ubi procul dubio erant etiam ii qui omnino non credunt; neque enim ipsi non sunt in monumentis) duas partes fecit, alios in resurrectionem vitæ, alios in resurrectionem judicii resurrecturos esse declarans.

43. Quod si dicunt non ibi intelligendos etiam eos qui omnino non credunt, sed eos qui per ignem salvi erunt, quia crediderunt, etiamsi male vixerunt, ut eorum transitoriam pœnam judicii nomine significatam arbitrentur. Quanquam hoc impudentissime dicatur, cum omnino Dominus omnes resurrecturos, in quibus sine dubio et increduli erunt, in duo divisorit, *vitam et judicium*; ita volens judicium æternum intelligi, quamvis hoc non addiderit, sicut et vitam. Neque enim ait, in resurrectionem vitæ æternæ; cum aliud utique intelligi noluerit. Videant tamen quid responsuri sunt, ubi ait, *Qui autem non credit, jam judicatus est* (Id. iii, 18). Nam hic procul dubio, aut judicium pro pœna æterna positum intelligent, aut per ignem salvos futuros etiam incredulos dicere audebunt; quoniam, *Qui non credit, inquit, jam judicatus est*, hoc est, jam judicio destinatus: et non erit quod pro magno beneficio pollicentur credentibus nequiterque viventibus, quando et ii qui non credunt non erunt perdendi, sed judicandi. Quod si dicere non audent, non audeant aliquid mitius polliceri eis de quibus dictum est, *per Legem judicabuntur*; quia constat judicium etiam pro æterna damnatione solere nominari. Quid, quod invenimus non solum minime mitioris, verum etiam deterioris conditionis esse illos qui scientes peccant? Illi sunt enim maxime qui legem acceperunt. Nam sicut scriptum est, *Ubi lex non est, nec prævaricatio* (Rom. iv, 15). Hinc est et illud, *Concupiscentiam nesciebam nisi lex diceret, Non concupisces. Occasione itaque accepta,*

¹ Apud Ehr. Lugd. Ven. Lov.: Neque illud. M.

*peccatum per mandatum operatum est in me omnem concupiscentiam (Rom. vii, 7, 8); et alia multa quae de hac re idem apostolus dicit. Ab hoc reatu graviore liberat gratia Spiritus sancti per Jesum Christum Dominum nostrum, quae diffusa charitate in cordibus nostris donat justitiae delectationem¹, qua immoderatio concupiscentiae supereretur. Hinc itaque confirmatur non solum nihil mitius, sed gravius aliquid intelligendum, de quibus dictum est, *Qui in Lege peccaverunt, per Legem judicabuntur; quam de illis qui sine Lege peccantes sine Lege peribunt: nec pro pœna transitoria hoc loco dictum judicium, sed pro ea qua etiam non credentes judicabuntur.**

44. Nam qui hac utuntur sententia ad promittendam salutem per ignem, illis qui etiam credentes pessime vivunt, ut eis dicant, *Qui sine Lege peccaverunt, sine Lege peribunt; qui autem in Lege peccaverunt, per Legem judicabuntur*, tanquam dictum sit, non peribunt, sed per ignem salvi erunt; nec illud attendere potuerunt, hoc Apostolum de illis qui sine Lege et illis qui in Lege peccaverunt dixisse, cum de Gentibus et de Judæis ageret; ut non tantum Gentibus, sed utrisque gratiam Christi, qua liberen- tur, necessariam demonstraret: quod tota² ipsa Epistola ad Romanos evidenter ostendit. Jam ergo etiam Judæis in lege peccantibus, de quibus dictum est, *per Legem judicabuntur*, non eos liberante gratia Christi, promittant, si placet, per ignem salutem; quoniam de his dictum est, *per Legem judicabuntur*. Quod si non faciunt, ne contra se ipsos veniant³, qui eos gravissimō infidelitatis crimen obstrictos esse dicunt: utquid transferunt ad infideles et fideles in eo quod ad fidem Christi attinet, illud quod dictum est de iis qui sine Lege et iis qui in Lege peccaverunt, cum de Judæis et de Gentibus ageretur, ut ad Christi gratiam utrique invitarentur?

CAPUT XXIV. — *Liberas fidei non sit fidelibus velamen malitiæ.* Neque enim dictum est, *Qui sine fide peccaverunt, sine fide peribunt; qui autem in fide peccaverunt, per fidem judicabuntur: sed, sine Lege dictum est, et, in Lege; ut satis appareret illum causam tangi, quæ inter Gentes et Judæos agebatur, non quæ inter bonos malosque Christianos.*

45. Quanquam si illo loco legem pro fide accipi volunt, quod nimis importunum et absurdum est, etiam hinc apertissimam possunt legere sententiam apostoli Petri, qui cū loqueretur de iis qui in occasionem carnis acceperant, et in velamentum malitiæ, quod scriptum est, *nos ad Novum Testamentum pertinentes, non ancillæ filios esse, sed liberæ, qua libertate Christus nos liberavit* (Galat. iv, 51); et putaverant hoc esse libere vivere, ut tanquam de tanta redemptione securi, quidquid liberet licere sibi arbitrarentur, non intuebentes quod dictum est, *Vos in libertatem vocati estis, fratres; tantum ne libertatem in*

*occasionem carnis detis (Id. v, 13); unde et ipse Petrus dicit, *Liberi, non sicut velamentum malitiæ habentes libertatem* (I Petr. ii, 16): ait de illis et in secunda Epistola sua, *Hi sunt fontes siccæ, et nebulæ a turbine exagitatae, quibus caligo tenebrarum reservata est: superba enim vanitatis loquentes illiciunt in concupiscentii carnis impudicitiae eos qui paululum effugerunt, in error conversati, libertatem illis promittentes, cum ipsi servent corruptionis. A quo enim quis devictus est, huic et servus addictus est. Si enim refugientes coinquinationes mundi in agnitionem Domini nostri et conservatoris Jesu Christi, his rursus implexi superantur, facta sunt illis posteriora deteriora prioribus. Melius enim erat illis non cognoscere viam justitiae, quam cognoscentes retrorsum reflecti a tradito sibi sancto mandato.* Contigit enim illis res veri proverbii, *Canis reversus ad suum vomitum, et sus lota in volutabris cœni.* Quid adhuc promittitur contra istam manifestissimam veritatem conditio melior iis qui cognoverunt viam justitiae, hoc est, Dominum Christum, et perdite vivunt, quam si⁴ omnino non cognovissent; cum apertissime dicatur, *Melius erat illis non cognoscere viam justitiae, quam cognoscentes retrorsum reflecti a tradito sibi sancto mandato?**

CAPUT XXV. — 46. *Sanctum mandatum quid, idque cognoscentes ac transgredientes quæ pœna maneat. Pœna transitoria baptizatis scelerate viventibus non promittenda.* Neque enim illud hoc loco intelligendum est sanctum mandatum, quo præceptum est ut in Deum credamus; quanquam eo ipso totum continetur, si eam intelligamus fidem creditum, quæ per dilectionem operatur: sed aperte expressit quid dicceret sanctum mandatum, id est, quo præceptum est ut ab hujus mundi coinquinationibus recedentes casta conversatione vivamus. Sic enim ait: *Si enim refugientes coinquinationes mundi in agnitionem Domini nostri et conservatoris Jesu Christi, his rursus implexi superantur, facta sunt illis posteriora deteriora prioribus.* Non ait, refugientes ignorantiam Dei, aut refugientes infidelitatem sæculi, vel tale aliquid; sed, *coinquinationes mundi*, in quibus est utique omnis immunditia flagitorum. Nam de his superius loquens, dixit, *Coepulantes vobiscum, oculos habentes plenos adulterii et indesinentis peccati* (II Petr. ii, 13-22). Ideo etiam fontes siccæ eos appellat: fontes videlicet, quod acceperint agnitionem Domini Christi; siccæ autem, quia non congruenter vivunt. De talibus quippe etiam Judas apostolus loquens, *Ii sunt, inquit, qui in dilectionibus vestris maculati coepulantur, sine timore semetipsos pascentes, nubes sine aqua* (Jude 1, 12); et cætera. Quod enim Petrus ait, *Coepulantes vobiscum, oculos habentes plenos adulterii*; hoc Judas, *In dilectionibus vestris maculati coepulantur.* Mixti sunt enim bonis in epulis Sacramentorum et dilectionibus plebium. Et quod Petrus ait, *Fontes siccæ*; hoc Judas, *Nubes sine aqua*; hoc Jacobus, *Fides mortua* (Jacobi ii, 20).

47. Non itaque promittatur pœna ignis transitoria turpiter scelerateque viventibus, quia viam justitiae

¹ Nonnulli codices, *dilectionem*.

² Sic MSS. At editi, *totum*.

³ Editi omissa particula, *ne*, habent, *contra se ipsos veniunt.* Emendantur a MSS.

⁴ In excusis, quasi. Verius in MSS., *quam si.*

cognoverunt, quibus melius erat non cognoscere, sicut veracissima Scriptura testatur. De talibus quippe etiam Dominus ait; *Et erunt novissima illius hominis pejora quam erant prima* (*Matth. xii, 45*); quoniam purgationis suae habitatorem Spiritum sanctum non recipiebat, fecit in se immundum spiritum multipliciorum redire. Nisi forte ideo sunt isti, de quibus agitur, meliores habendi, quia non redierunt ad immunditiam adulterorum, sed ab ea non recesserunt; nec purgati se rursus inquinaverunt, sed purgari recusaverunt. Neque enim, ut relevata conscientia intrept ad Baptismum, dignantur saltem vomere pristinas immunditias, quas canum more iterum sorbeant; sed in lavacri ipsius sapientiae pertinaciter crudo pectore indigestam nequijam tenere contendunt: nec occultant eam pollicitatione vel ficta, sed impudentia professionis eructant: nec exeuntes de Sodomis more uxoris Loti, in praeterita iterum attendunt (*Gen. xix, 26*), sed omnino de Sodomis dignantur exire; imo ad Christum cum Sodomis conantur intrare. Paulus apostolus dicit, *Qui prius sui blasphemus et persecutor et injuriator; sed misericordiam consecutus sum, quia ignorans feci in incredulitate* (*I Tim. i, 15*): et istis dicitur, *Tunc potius misericordiam consequemini, si scientes male vixeritis in ipsa fide. Num longum est, et pene infinitum omnia testimonia Scripturarum velle colligere, quibus appareat non solum non esse mitigationem causam eorum qui scientes, quam qui nescientes vitam nequissimam et iniquissimam ducunt, verum etiam hoc ipso esse gravorem: proinde ista suscep-riunt.*

CAPUT XXVI. — 48. *Baptismo nisi vita respondeat, non obtinebitur regnum cœlorum. Peccata triplicis generis triplici remedio sananda. Caveamus ergo diligenter in adjutorio Domini Dei nostri non facere homines male securos, dicentes eis quod si fuerint in Christo baptizati, quomodolibet in ea fide vixerint, eos ad salutem æternam esse venturos: ne sic faciamus Christianos, quomodo Judæi proselytos, quibus Dominus ait, *Væ vobis, Scribæ et Pharisæi, qui circumvallis mare et terram, facere unum proselytum; cum autem feceritis, facitis eum filium gehennæ duplo quam vos estis* (*Matth. xxiii, 15*). Sed potius sanam doctrinam Dei magistri in utroque teneamus; ut sancto Baptismo consona sit vita christiana, nec cuiquam homini, si utrumlibet defuerit, vita promittatur æterna. Qui enim dixit, *Nisi quis renatus fuerit ex aqua et Spiritu*⁴, *non intrabit in regnum cœlorum* (*Jogn. iii, 5*); ipse etiam dixit, *Nisi abundaverit justitia vestra super Scribæ et Pharisæorum, non intrabitis in regnum cœlorum* (*Matth. v, 20*). De illis quippe ait: *Scribæ et Pharisæi super cathedram Moysi sedent: quæ dicunt, facite; quæ autem faciunt, facere nolite: dicunt enim et non faciunt* (*Id. xxiii, 2, 3*). Ergo justitia eorum est, dicere et non facere: ac per hoc nostram esse voluit abundantem super illorum, dicere et facere; quæ si non fuerit, non intrabitur in regnum cœlorum. Non quia quisquam ita debet extolliri, ut,*

non dicam apud alios jactare, sed apud se ipsum putare audeat se in hac vita esse sine peccato: sed nisi essent quædam ita gravia, ut etiam excommunicatione plectenda sint, non diceret Apostolus, *Congregatis vobis et meo spiritu tradere ejusmodi sañæ in interitum carnis, ut spiritus salvus sit in die Domini Jesu* (*I Cor. vi, 4, 5*). Unde etiam dicit: *Ne lugeam multos, qui ante peccaverunt, et non egerunt pœnitentiam super immunditiam et fornicationem quam gesserunt* (*II Cor. xii, 21*). Item nisi essent quædam non ea humilitate pœnitentiæ sananda, qualis in Ecclesia datur eis qui proprie pœnitentes vocantur, sed quibusdam correctionum medicamentis, non diceret ipse Dominus: *Corripe eum inter te et ipsum solum; et si te audierit, Iucratus es fratrem tuym* (*Matth. xviii, 15*). Postremo nisi essent quædam sive quibus hæc vita non agitur, non quotidiam medelam poneret in oratione quam docuit, ut dicamus: *Dimitte nobis debita nostra, sicut et nos dimittimus debitoribus nostris* (*Id. vi, 12*).

CAPUT XXVII. — 49. *Epilogus prædictorum. Jam satis, quantum arbitror, de tota illa opinione quid mihi videretur expōsai, ubi tres quæstiones moverunt: unam de permixtione in Ecclesia bonorum et malorum, tanquam tritici et zizaniorum: ubi cayendum est, ne ideo putemus esse propositas istas similitudines, vel hanc, vel de immundis in arca animalibus, vel quæcumque alia idem significant, ut dormiat Ecclesiæ disciplina, de qua in figura illius mulieris dictum est, *Severæ sunt conversationes domus ejus* (*Prov. ii, 18, sec. LXX*); sed ut non eo usque progrediatur dementiae potius temeritas, quam seceritas diligentiae, ut quasi bonos a malis per nefaria schismata separare præsumat. Neque enim per has similitudines et prænuntiationes consilium desidiae datum est bonis, qua negligant quod prohibere debent; sed patientiæ, qua perseverant salva doctrina veritatis quod emendare non valent. Nec quia scriptum est introisse ad Noe in arcam etiam immunda animalia (*Gen. vii, 2*), ideo præpositi vetare non debent, si qui immundissimi ad Baptismum velint intrare saltantes, quod est certe mitius quam mœchanites: sed per hanc figuram rei gestæ prænuntiatum est immundos in Ecclesia futuros propter tolerantiae rationem, non propter doctrinæ corruptionem, vel disciplinæ dissolutionem. Non enim quacumque libuit intraverunt immunda animalia arcæ compage confacta, sed ea integra per unum atque idem ostium, quod artifex fecerat. Altera quæstio est, in qua eis visum est fidem solam baptizandis esse tradendam, postea vero jam baptizatos docendos esse de moribus. Sed satis demonstratum est, nisi fallor, tunc magis pertinere ad curam speculatoris, cum omnes qui sacerdium competunt Sacramentum, omnia quæ dicuntur intentius et sollicitius audiunt, non tacere de pœna quam male viventibus Dominus comminatur; ne in ipso Baptismo rei sint gravissimorum criminum, quo veniunt ut remittatur⁴ reatus omnium peccato-*

⁴ Veteres libri, ex *Spiritu sancto*: omissa, *aqua et*.

⁴ Plures MSS., *remittantur*.

rum. Tertia quæstio est periculosissima, quæ parum considerata, et non secundum divinum eloquium pertractata, tota illa opinio mihi videtur exorta, in qua promittitur scelestissime turpissimeque viventibus, etiam si eo modo vivere perseverent, et tantummodo credant in Christum, ejusque Sacraenta percipiunt, eos ad salutem vitam æternam esse venturos: contra apertissimam Domini sententiam, qui desideranti vitam æternam respondit, *Si vis venire ad vitam, serva mandata*; et commemoravit quæ mandata (Matth. xix, 17-19), ubi ea scilicet peccata viuantur, quibus nescio quomodo salus æterna promittitur propter fidem sine operibus mortuam. De his tribus quæstionibus satis, quantum existimo, disputavi: demonstravique sic tolerandos in Ecclesia malos, ut non negligatur ecclesiastica disciplina; sic catechizandos eos qui Baptismum petunt, ut non solum audiant atque suscipiant quid credere, verum etiam qualiter vivere debeant; sic promitti fidelibus

vitam æternam, ut non etiam per fidem mortuam, quæ sine operibus salvare non potest, ad eam se quisque pervenire posse arbitretur, sed per illam fidem gratiae, quæ per dilectionem operatur. Non itaque culpentur dispensatores fideles, non sua negligentia vel pigritia, sed quorumdam potius contumacia, qui pecuniam dominicam recusant accipere, et adulterinam suam cogunt servos dominicos erogare, dum non sunt saltem tales esse mali, quales sanctus Cyprianus commemorat (*Serm. de Lapsis*), saeculo verbis solis et non factis renuntiantes; quando nec verbis renuntiare diaboli operibus volunt, cum se in adulterio permanentes voce apertissima profitentur. Si quid ab eis dici solet, quod forte disputando non attigi, tale esse arbitratus sum, cui mea responsio necessaria non fuisset; sive quod ad rem de qua agitur, non pertineret, sive quod tam leve esset, ut a quolibet redargui facilime posset.¹

¹ In veteribus libris. additur, *Deo gratias.*

ADMONITIO IN SUBSEQUENTEM LIBRUM.



Enchiridion ad Laurentium inter postremas suas lucubrationes recensuit Augustinus in libro Retractionum secundo, postque sex contra Julianum libros, qui ad annum circiter 421 pertinent, collocavit. Hunc certe librum labente anno 420 nondum perfeccerat. Nam Hieronymum, qui anno eodem 420, juxta Prosperum, pridie calendas octobris obiit, jam morte functum laudabat cap. 87, in haec verba: *Sanctæ memoriae Hieronymus presbyter scriptum reliquit.*

Laurentius porro, cui scriptus liber, frater Dulcitii appellatur in libro de octo Dulcitii Quæstionibus, quæst. 1, n. 10; quia propinquitate et cognatione, uti arbitramur, naturali, non christiana tantum Dulcitio coniunctus erat. Virum ab eruditione et a piis studiis egregie commendat, sed a laicorum fideliū grege nihil secernit Augustinus, qui et Operis initio filium ipsum vocat, et in fine eum sibi in Christi membris dilectum dicit. Neque Laurentii dignitas explorata est et probata satis ex vulgato libri titulo. Quippe codices nostri antiquiores habent tantum, *Incipit Enchiridion*: qui vero *Ad Laurentium primicerium* addunt, aliquanto recentiores sunt, atque isti secum inyicem haud omnino consentientes. Carcassonensis præsert, *Ad Laurentium primicerium notariorum urbis Romæ*. Unus e Vaticanis in fronte Operis, *Ad Laurentium primicerium Romanæ Ecclesiæ*; et ad calcem habet, *Ad Laurentium primicerium Ecclesiæ urbis Romanæ*. Cisterciensis et alii quidam MSS. *ad Laurentium primicerium*: Regius, etc., *ad Laurentium*, nihilque supra; quomodo etiam editiones Amerbachii et Erasmi. At Lovaniensium editio titulo addidit, *primicerium urbis Romæ*. In vetere libro Compendiensi legitur, *Ad Laurentium notarium urbis Romæ*. In altero e Colbertinis, *Ad Laurentium diaconum*.

Tametsi vero liber recte appelletur Enchiridion ipsius concessu Augustini in cap. 122, quia scilicet Enchiridion postulaverat Laurentius, id est, opusculum mole exiguum de ejus manibus non recessurum; ibidem tamen Augustinus, itemque in Retractionibus, in libro de octo Dulcitii Quæstionibus, et in Epistola 251, ad Darium constanter vocat librum de Fide, Spœ et Charitate; nec aliter Possidius Indic, cap. 6. Ad hæc enim tria commodum visum est S. Doctori revocare Laurentii quæstiones omnes, qui sapientiæ studio incensus, ac nostræ, quam profitebatur, amore religionis, volebat in primis certum propriumque fidei catholicæ fundatum, tolius christianæ doctrinæ summam, et universim quidquid orthodoxa fide ac religione a primo ad ultimum teneretur, ab Augustino accipere, eoque magistro institui et muniri contra diversas hæreses eas tempestate grassantes.

Prima quidem et quam maxima libri parte Augustinus quæ credenda sint docet, servato Symboli ordine, ac varias hæreses Manichæorum, Apollinaristarum, Priscillianistarum, Arianorum, præcipueque Pelagianorum, tacito earum nomine, passim refellit. Secundam partem, de iis quæ ad Spem, pertinent, in dominicæ orationis expositione quam brevissima impendit. Tertiam postremo, nec eam prolixam, adjungit de Charitate.